



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", br. 32/02 i 102/09), direktor Uprave za indirektno oporezivanje donosi

U P U T S T V O

O PRIVREMENOM UVOZU

GLAVA I. OPĆE ODREDBE

Član 1.

(Predmet)

Ovim Uputstvom propisuje se način provođenja carinskog postupka privremenog uvoza robe (u daljnjem tekstu: privremeni uvoz), trajanje i razduživanje privremenog uvoza, carinski nadzor u privremenom uvozu, obračun carinskog duga i druga pitanja u vezi privremenog uvoza.

Član 2.

(Pojam i pravni osnov privremenog uvoza)

(1) Privremeni uvoz je carinski postupak sa ekonomskim učinkom, a ujedno i postupak sa odgođenim plaćanjem uvoznih dažbina.

(2) Privremeni uvoz je carinski postupak kojim se dopušta upotreba robe koja nije bh. roba (u daljnjem tekstu: roba) u carinskom području Bosne i Hercegovine u određene propisane svrhe, bez njenog podlijeganja mjerama trgovinske politike, kada je ta roba namijenjena za ponovni izvoz u određenom roku u kojem mora ostati u nepromijenjenom stanju, osim uobičajenog smanjenja vrijednosti usljed njene normalne upotrebe za vrijeme trajanja privremenog uvoza.

(3) Privremeni uvoz reguliran je:

- a) odredbama Konvencije o privremenom uvozu - *Istanbul, 26. juna 1990. godine* ("Službeni glasnik BiH - Međunarodni ugovori", broj 1/10), što uključuje i Aneксе te konvencije i njihove priloge (u daljnjem tekstu: Konvencija),
- b) odredbama čl. 61., 81. do 87., 133. do 140. i 193. Zakona o carinskoj politici Bosne i Hercegovine ("Službeni glasnik BiH", br. 57/04, 51/06, 93/08, 54/10 i 76/11), (u daljnjem tekstu: Zakon),
- c) odredbama čl. 136., 139. do 143., 299. do 320. i 350. do 381. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", br. 63a/04, 60/06 i 57/08), (u daljnjem tekstu: Odluka), uključujući i Priloge Odluke navedene u tim odredbama,
- d) Uputstvom o provođenju carinskog postupka po karnetu ATA,
- e) Uputstvom o privremenom uvozu i izvozu ambalaže i paleta,
- f) propisima o popunjavanju carinske prijave.

Član 3. (Definicije)

U primjeni ovog Uputstva pojmovi imaju sljedeće značenje:

- a) "odobrenje" - odobrenje nadležnog carinskog organa za korištenje privremenog uvoza,
- b) "imalac odobrenja" - lice kojem je izdato odobrenje za privremeni uvoz,
- c) "prijavni carinski ured" - carinski ured naveden u odobrenju kao ovlašteni ured za prihvatanje carinske prijave kojom se roba prijavljuje za privremeni uvoz. Prijavni carinski ured je i carinski ured koji je prihvatio carinsku prijavu za privremeni uvoz kada je ona ujedno i zahtjev za taj postupak,
- d) "nadzorni carinski ured" - carinski ured naveden u odobrenju kao ovlašteni ured za vršenje nadzora u postupku privremenog uvoza. Nadzorni carinski ured je carinski ured koji je nadležan za mjesto gdje se roba koristi, a ako se roba koristi u više mjesta, tada je nadzorni ured carinski ured koji je nadležan prema mjestu gdje će se roba prvo koristiti. Nadzorni carinski ured je i carinski ured koji je prihvatio carinsku prijavu za privremeni uvoz kada je ona ujedno i zahtjev za taj postupak,
- e) "otpusni carinski ured" - carinski ured naveden u odobrenju kao ovlašteni ured za prihvatanje carinske prijave kojom se roba stavljenom u privremeni uvoz određuje novo carinski odobreno postupanje ili upotreba (razduživanje privremenog uvoza). Otpusni carinski ured je i carinski ured koji je prihvatio carinsku prijavu za privremeni uvoz kada je ona ujedno i zahtjev za taj postupak,
- f) "rok za razduživanje privremenog uvoza (u daljnjem tekstu: rok za ponovni izvoz)" - rok do kojeg se roba stavljena u privremeni uvoz mora ponovno izvesti ili joj se odrediti drugo carinski odobreno postupanje ili upotreba,
- g) "lični predmeti" - svi predmeti, novi ili upotrebljavani, koje putnik privremeno uvozi a koje može s razlogom koristiti za njegovu ličnu upotrebu za vrijeme putovanja, uzimajući u obzir sve okolnosti putovanja, ali isključujući svu robu uvezenu u komercijalne svrhe (opisna lista ličnih predmeta nalazi se u Prilogu I Aneksa B.6 Konvencije),
- h) "roba uvezena u sportske svrhe" - sportski rekviziti i ostali predmeti koje putnik privremeno uvozi za njegovu upotrebu u sportskim takmičenjima ili demonstriranju ili za potrebe treninga u Bosni i Hercegovini (opisna lista te robe nalazi se u Prilogu II Aneksa B.6 Konvencije),
- i) "robom uvezenom u humanitarne svrhe" - smatra se: medicinska, hirurška i laboratorijska oprema i pošiljke pomoći,
- j) "pošiljkama pomoći" smatra se: sva roba, poput vozila ili drugih prijevoznih sredstava, pokrivača, šatora, montažnih kuća, ili druge vrste robe za primarne potrebe, koja se upućuje kao pomoć onima koje je pogodila elementarna nepogoda ili slične katastrofe,
- k) "prijevozno sredstvo" - svaki brod (uključujući tegljače i teretne brodove bez obzira da li ih nosi brod ili ne, gliseri), lebdjelice, letjelice, motorna vozila (uključujući motocikle, prikolice, poluprikolice, i kombinacije vozila) i vozila koja se kreću po šinama; zajedno sa njihovim normalnim rezervnim dijelovima, dodacima i opremom ukrcanom na vozila (uključujući specijalnu opremu za utovar, istovar, rukovanje i zaštitu tereta),
- l) "normalni rezervoari" - rezervoari koje je proizvođač namijenio za sve vrste vozila istog tipa kojeg je i vozilo u pitanju, a čije trajno priključenje omogućava direktnu upotrebu goriva, i u svrhu pogona, i za rad rashladnih i drugih sistema tokom prijevoza. Rezervoari koji se priključuju na prijevozna sredstva predviđena za direktnu upotrebu drugih vrsta goriva i cisterne koje odgovaraju drugim sistemima kojima prijevozna sredstva mogu biti opremljena također će se smatrati normalnim rezervoarima,
- m) "komercijalna upotreba prijevoznog sredstva" - prijevoz lica uz naknadu ili industrijski ili komercijalni prijevoz robe, uz ili bez naknade,
- n) "privatna upotreba prijevoznog sredstva" - prijevoz isključivo u privatne svrhe dotičnog lica, koji isključuje komercijalnu upotrebu,
- o) "unutrašnji promet" - prijevoz lica ili robe preuzete ili ukrcane u carinskom području Bosne i Hercegovine radi smještaja ili iskrcaja u mjestu tog područja,
- p) "normalna upotreba robe" - (npr. prijevoznih sredstava, strojeva, uređaja i slično) uključuje uobičajene popravke i održavanje, remont i podešavanje ili mjere neophodne za očuvanje robe ili osiguravanje ispunjenja tehničkih uvjeta za njenu upotrebu tokom privremenog uvoza (a ne za poboljšanje robe),
- r) "karnet ATA" - međunarodni carinski dokument za privremeni uvoz uz potpuno oslobođanje od plaćanja uvoznih dažbina (ne uključuje prijevozna sredstva), koji obuhvata i odobrenje za taj postupak i uključuje međunarodno priznatu garanciju za pokriće carinskog duga koji je nastao ili bi mogao nastati (vrijedi kao pismena carinska prijava za navedeni postupak),
- s) "kontejner" - oprema za prijevoz (pokretni kontejner, pokretni rezervoar ili slični objekat) koja je:
 1. potpuno ili djelimično zatvorena tako da sačinjava odjeljak namijenjen prijevozu robe,
 2. trajnog karaktera, i prema tome, dovoljno čvrsta za višekratnu upotrebu,

3. izrađena za lako rukovanje, naročito pri prenošenju iz jednog na drugo prijevozno sredstvo,
4. posebno izrađena za olakšavanje prijevoza robe, jednim ili sa više vrsta prijevoznih sredstava, bez potrebe među-pretovara robe,
5. izrađena tako da se lako puni i prazni i
6. unutrašnje zapremine od najmanje jednog kubnog metra.

Član 4.

(Privremeni uvoz i trgovinske mjere)

(1) Privremeni uvoz može se odobriti:

- a) uz potpuno oslobađanje od plaćanja uvoznih dažbina, u kom slučaju se na robu stavljen u taj postupak ne plaćaju uvozne dažbine,
- b) uz djelimično oslobađanje od plaćanja uvoznih dažbina, u kom slučaju se na robu stavljen u taj postupak plaćaju uvozne dažbine i porez na dodatu vrijednost (u daljnjem tekstu: PDV) za svaki mjesec ili dio mjeseca tokom kojeg traje privremeni uvoz, u iznosu od 3% od iznosa uvoznih dažbina i PDV-a koji bi se platio na navedenu robu da je ista bila stavljen u slobodan promet onog dana kada je stavljen u privremeni uvoz.

(2) Dok se nalazi u privremenom uvozu, roba ne podliježe trgovinskim mjerama predviđenim propisima Bosne i Hercegovine, izuzev ako se takve mjere odnose na ulazak robe u carinsko područje Bosne i Hercegovine (npr. predočenje propisane uvozne dozvole pri ulasku robe u carinsko područje Bosne i Hercegovine).

Član 5.

(Uvjeti za odobravanje privremenog uvoza)

(1) Privremeni uvoz, u skladu sa članom 134. Zakona, može se odobriti na zahtjev lica koje koristi robu ili organizuje njeno korištenje.

(2) Privremeni uvoz može se odobriti kada je moguće osigurati identifikaciju robe po završetku privremenog uvoza (da se kod privremenog uvoza i ponovnog izvoza radi o istoj robi), a izbor načina identifikacije ovisi od karaktera robe, mogućeg rizika zamjene i drugo. Kao identifikacione mjere mogu se uzeti opis robe, brojevi ili oznake trajno pričvršćene na robu, fotografije, stavljanje pečata carinske službe gdje je to primjenjivo, stavljenе oznake carinske službe druge države ako postoje, popis pregleda inventara korisnika privremenog uvoza ili druge raspoložive mjere identifikacije i kontrole.

(3) Privremeni uvoz može se odobriti i bez osiguravanja identifikacije robe kada, u pogledu karaktera robe ili radnje koju treba izvršiti (npr. kod robe male vrijednosti ili rezervnih dijelova za robu u privremenom uvozu), odsustvo identifikacionih mjera ne dovodi do bilo kakve zloupotrebe postupka.

GLAVA II. PRIVREMENI UVOZ UZ POTPUNO OSLOBAĐANJE OD PLAĆANJA UVOZNIH DAŽBINA

Član 6.

(Roba za koju se može odobriti privremeni uvoz uz potpuno oslobađanje od plaćanja uvoznih dažbina i način prijavljivanja)

(1) Privremeni uvoz uz potpuno oslobađanje od plaćanja uvoznih dažbina može se odobriti za robu i pod uvjetima propisanim pojedinačnim Aneksima Konvencije i odredbama čl. 352. do 375. Odluke, u sljedećim slučajevima:

- a) roba namijenjena izlaganju ili upotrebi na izložbama, sajmovima, sastancima ili sličnim priredbama - Aneks B.1 i član 373. i Prilog 49 Odluke,
- b) stručna oprema - Aneks B.2 i čl. 366. i 374. Odluke,
- c) kontejneri, palete, ambalaža, uzorci i druga roba koja se uvozi u vezi sa nekom komercijalnom operacijom - Aneks B.3 i čl. 353., 354., 365., 368., 370. i 371. Odluke,
- d) roba za proizvodne djelatnosti - Aneks B.4 i čl. 369. i 372. Odluke,
- e) roba za potrebe obrazovanja, nauke i kulture - Aneks B.5 i čl. 361. i 367. Odluke,

- f) lični predmeti i roba uvezena u sportske svrhe - Aneks B.6 i član 360. Odluke,
- g) materijali turističke promocije - Aneks B.7,
- h) roba uvezena u pograničnom prometu - Aneks B.8 i član 364. stav 2. Odluke,
- i) roba uvezena u humanitarne svrhe - Aneks B.9 i čl. 362. i 363. Odluke,
- j) prijevozna sredstva - Aneks C i čl. 352., 355. do 359., 374. i 381. Odluke,
- k) životinje - Aneks D i član 364. stav 1. Odluke,
- l) rezervni dijelovi, pribor i oprema uvezena radi održavanja i popravke robe koja je stavljena u privremeni uvoz - Aneks B.2 (član 2. tačka (b), Aneks B.3 (član 2. tačka (c), Aneks B.5 (član 2. tačka (b), Aneks C (član 2. tačka (b) i član 374. Odluke,
- m) roba iz člana 375. Odluke.

(2) Za privremeni uvoz uz potpuno oslobađanje od plaćanja uvoznih dažbina roba može biti prijavljena na jedan od sljedećih načina:

- a) prijavljivanje drugom radnjom (bez podnošenja pismenog ili usmenog zahtjeva),
- b) usmenom carinskom prijavom (u daljnjem tekstu: usmena prijava),
- c) podnošenjem karneta ATA,
- d) podnošenjem carinske prijave u pismenoj formi ili korištenjem tehnike obrade podataka (u daljnjem tekstu: carinska prijava),
- e) podnošenjem zahtjeva za izdavanje pismenog odobrenja za privremeni uvoz na obrascu iz Priloga 43 Odluke.

(3) U skladu sa članom 142. Odluke, prijavljivanje za privremeni uvoz uz potpuno oslobađanje od plaćanja uvoznih dažbina usmenim putem ili drugom radnjom ne primjenjuje se na robu u vezi koje se traži povrat dažbina, odnosno na robu koja podliježi zabrani ili ograničenju ili nekoj drugoj mjeri.

Član 7.

(Prijavljivanje robe za i razduživanje privremenog uvoza uz potpuno oslobađanje od plaćanja uvoznih dažbina drugom radnjom)

(1) U skladu sa članom 139. Odluke i niže navedenim Aneksima Konvencije, za privremeni uvoz uz potpuno oslobađanje od plaćanja uvoznih dažbina drugom radnjom prijavljuje se, kod ulaznog graničnog carinskog ureda, sljedeća roba:

- a) lični predmeti i roba u sportske svrhe koju, u skladu sa Aneksom B.6 i članom 360. Odluke privremeno uvozi putnik koji privremeno ulazi u carinsko područje Bosne i Hercegovine, a koji tu nije inače nastanjen (vidi i stav (2) ovog člana),
- b) prijevozna sredstva iz čl. 353. do 358. Odluke, Aneksa B.3 i Aneksa C (palete, kontejneri, željeznička prijevozna sredstva, prijevozna sredstva vazdušnog i pomorskog saobraćaja, prijevozna sredstva unutrašnjim vodama i drumska prijevozna sredstva (vidi čl. 21., 23. i 24. ovog Uputstva, te stav (2) ovog člana), osim priključnog prijevoznog sredstva iz člana 24. stav (3) ovog Uputstva koje ne ispunjava uvjete za privremeni uvoz uz potpuno oslobađanje od plaćanja uvoznih dažbina,
- c) materijal za razonodu pomoraca koji se koristi na stranom brodu angažovanom u međunarodnom pomorskom saobraćaju shodno Aneksu B.5 i članu 361. tačka (a) Odluke.

(2) U skladu sa članom 376. Odluke, kada se lični predmeti, roba uvezena u sportske svrhe ili prijevozna sredstva prijavljuju usmeno ili bilo kojom drugom radnjom, carinski organ može zahtijevati podnošenje carinske prijave kada je u pitanju veliki iznos uvoznih dažbina ili kada postoji ozbiljan rizik od nepridržavanja obaveza iz predmetnog postupka.

(3) U slučajevima iz stava (1) ovog člana, a u skladu sa članom 140. Odluke, prijavljivanje robe za privremeni uvoz uz potpuno oslobađanje od plaćanja uvoznih dažbina drugom radnjom (konkludentni ili neverbalni oblik), smatra se:

- a) prolazak kroz "zelenu traku ili traku ništa za carinjenje" na graničnom prijelazu sa sistemom dviju traka,
- b) prolazak preko graničnog prijelaza bez sistema rada sa dvije trake bez spontanog prijavljivanja,
- c) stavljanje naljepnice "ništa za carinjenje" na staklo putničkog vozila gdje je to moguće,
- d) sam čin prelaska granice carinskog područja Bosne i Hercegovine.

(4) Druge radnje iz stava (3) ovog člana smatraju se zahtjevom, a odsustvo intervencije carinskog organa odobrenjem za privremeni uvoz uz potpuno oslobađanje od plaćanja uvoznih dažbina.

(5) Kada carinskom organu nije prijavljena pismeno ili usmeno, za robu iz stava (1) ovog člana smatra se da je prijavljena za ponovni izvoz (kojim se razdužuje privremeni uvoz) radnjom iz stava (3) ovog člana.

(6) Kada se provjerom otkrije da je radnja iz stava (3) ovog člana izvršena, ali da privremeno uvezena roba nije ispunjavala uvjete iz člana 139. Odluke, odnosno iz stava (1) ovog člana, za tu robu se, shodno članu 141. stav 2. Odluke, smatra da je nezakonito uvezena.

Član 8.

(Prijavljivanje robe za privremeni uvoz uz potpuno oslobađanje od plaćanja uvoznih dažbina usmenom prijavom)

(1) Privremeni uvoz uz potpuno oslobađanje od plaćanja uvoznih dažbina, u skladu sa članom 136. Odluke i niže navedenim Aneksima Konvencije, može se odobriti na osnovu usmene prijave korisnika tog postupka kod ulaznog graničnog carinskog ureda, za sljedeću robu:

- a) radijsku i televizijsku opremu za produkciju i emitovanje i specijalno adaptirana radijska ili televizijska vozila i njihovu opremu (član 4. Aneksa B.2),
- b) kontejnere, palete i ambalažu (član 5. Aneksa B.3),
- c) lične predmete putnika i robu uvezenu u sportske svrhe (član 4. Aneksa B.6),
- d) robu uvezenu u pograničnom prometu (član 4. Aneksa B.8),
- e) za pošiljke pomoći; a za medicinsku, hiruršku i laboratorijsku opremu kad god je to moguće (član 4. Aneksa B.9),
- f) tegleće životinje, životinje uvezene za tranzitnu ispašu ili ispašu unutar pograničnog područja (član 4. Aneksa D).

(2) Za robu iz stava (1) ovog člana, osim ličnih predmeta (vidi i stav (3) ovog člana), korisnik privremenog uvoza pri njenom usmenom prijavljivanju carinskom uredu podnosi "Popis robe za privremeni uvoz uz usmenu prijavu" na obrascu iz Priloga 1. ovog Uputstva (u daljnjem tekstu: "Popis robe"). U iste svrhe, umjesto "Popisa robe", može se prihvatiti i drugi dokument koji prati robu (npr. profaktura ili drugi dokument ili popis robe kojeg je korisnik privremenog uvoza sačinio u državi privremenog izvoza), ako isti sadrži podatke iz obrasca "Popisa robe" (u daljnjem tekstu riječi: "Popis robe" obuhvataju i navedeni drugi dokument).

(3) U skladu sa članom 4. stav 1. Aneksa B.6 za lične predmete neće se zahtijevati "Popis robe". Međutim, i kada se radi o ličnim predmetima i robi uvezenoj u sportske svrhe uz koju je povezan visok iznos uvoznih dažbina i PDV-a, carinski organ, shodno članu 4. Aneksa B.6 i članu 376. Odluke, može tražiti carinski dokument i obezbjeđenje za plaćanje carinskog duga.

(4) Roba iz stava (1) ovog člana može se prijaviti za privremeni uvoz uz potpuno oslobađanje od plaćanja uvoznih dažbina i na osnovu karneta ATA ako korisnik privremenog uvoza podnese karnet ATA. Međutim, postupajući carinski ured ne može tražiti (uslovljavati) obaveznu primjenu karneta ATA, obzirom da korisnik postupka može navedenu robu prijaviti i usmeno uz podnošenje "Popisa robe" (uz izuzeće, u pogledu "Popisa robe", navedeno u stavu (3) ovog člana).

Član 9.

(Postupak privremenog uvoza uz potpuno oslobađanje od plaćanja uvoznih dažbina na osnovu usmene prijave uz "Popis robe")

(1) Robu iz člana 8. stav (1) ovog Uputstva, osim ličnih predmeta, koja se privremeno uvozi korisnik tog postupka (deklarant) dužan je upisati u obrazac "Popis robe", koji popunjava i potpisuje u dva primjerka.

(2) Postupajući carinski službenik, nakon provedenog postupka, na oba primjerka "Popisa robe" unosi broj i datum iz Kontrolnika privremenog uvoza, potpis i službenu šifru i ovjerava službenim pečatom. Jedan primjerak ovjerenog "Popisa robe" službenik predaje korisniku postupka, a drugi zadržava u službenoj evidenciji i odlaže ga u poseban registrator, po redoslijedu broja iz navedenog kontrolnika.

Član 10.

(Razduživanje privremenog uvoza uz potpuno oslobađanje od plaćanja uvoznih dažbina ponovnim izvozom na osnovu usmene prijave)

(1) Ponovni izvoz iz carinskog područja Bosne i Hercegovine robe privremeno uvezene na osnovu "Popisa robe", korisnik privremenog uvoza usmeno prijavljuje kod izlaznog graničnog carinskog ureda, uz predočenje robe i podnošenje vraćenog mu primjerka "Popisa robe" iz člana 9. stav (2) ovog Uputstva, te njegove kopije ukoliko želi da isti ima nakon razduživanja privremenog uvoza.

(2) Postupajući carinski službenik, nakon provedenog postupka pri ponovnom izvozu robe iz stava (1) ovog člana, na podnijetom "Popisu robe" iz stava (1) ovog člana i njegovoj kopiji ovjerava razduživanje privremenog uvoza unošenjem zabilješke: "ponovni izvoz" sa datumom ponovnog izvoza, što ovjerava potpisom, službenom šifrom i službenim pečatom, te privremeni uvoz za robu koja se ponovno izvozi razdužuje i u Kontrolniku privremenog uvoza (pod brojem pod kojim je taj popis evidentiran pri privremenom uvozu). Nakon toga zadržava podnijeti "Popis robe" koji prilaže uz primjerak tog "Popisa robe" kojeg je zadržao u skladu sa članom 9. stav (2) ovog Uputstva (pri ulasku robe u privremeni uvoz), a njegovu kopiju vraća korisniku postupka.

(3) Ukoliko izlazni granični carinski ured preko kojeg se roba iz stava (1) ovog člana ponovno izvozi nije ujedno i ulazni granični carinski ured preko kojeg je ta roba privremeno uvezena, izlazni granični carinski ured zadržani ovjereni "Popis robe" iz stava (2) ovog člana, službenim putem, dostavlja ulaznom graničnom carinskom uredu, a zadržava njegovu kopiju. Primljeni "Popis robe" ulazni granični carinski ured prilaže uz primjerak tog "Popisa robe" kojeg je zadržao u skladu sa članom 9. stav (2) ovog Uputstva i razdužuje privremeni uvoz i u Kontrolniku privremenog uvoza.

Član 11.

(Postupak razduživanja privremenog uvoza uz potpuno oslobađanje od plaćanja uvoznih dažbina stavljanjem robe u drugi carinski postupak)

(1) Ukoliko korisnik postupka, robu privremeno uvezenu na osnovu "Popisa robe" u cjelosti namjerava staviti u drugi carinski postupak (uz ispunjenje uvjeta za taj postupak), istu prijavljuje kod najbližeg carinskog ureda podnošenjem carinske prijave za namjeravani postupak. U polju 40 carinske prijave (prethodni dokument) unosi se sljedeće: "Popis robe/šifra carinskog ureda koji je ovjerio popis/evidencijski broj popisa iz kontrolnika i dvije posljednje cifre godine u kojoj je on sačinjen" (npr: "Popis robe/10006/65/12"), koji popis se prilaže uz odnosnu carinsku prijavu. Kopiju odnosne carinske prijave i ovjerenog "Popisa robe", postupajući carinski ured, službenim putem, dostavlja ulaznom graničnom carinskom uredu, koji ured iste prilaže uz primjerak "Popisa robe" kojeg je zadržao u skladu sa članom 9. stav (2) ovog Uputstva i razdužuje privremeni uvoz i u Kontrolniku privremenog uvoza.

(2) Kada se roba iz stava (1) ovog člana djelimično stavlja u drugi carinski postupak (uz ispunjenje uvjeta za taj postupak), carinski službenik će u "Popisu robe" unijeti zabilješku: "Roba pod rednim brojem prijavljena po carinskoj prijavi" (navesti vrstu, broj i datum carinske prijave, npr. IM4 1360/20.08.2012), koju će potom ovjeriti potpisom, službenom šifrom i službenim pečatom. Ovjereni "Popis robe" vraća korisniku postupka, jednu kopiju tog popisa zadržava uz carinsku prijavu (koji popis se unosi u polje 40 te prijave, vidi stav (1) ovog člana), a jednu kopiju i kopiju odnosne carinske prijave, službenim putem, dostavlja ulaznom graničnom carinskom uredu koji ured iste prilaže uz primjerak "Popisa robe" kojeg je zadržao u skladu sa članom 9. stav (2) ovog Uputstva i razdužuje privremeni uvoz i u Kontrolniku privremenog uvoza samo za robu razduženu navedenom carinskom prijavom.

(3) Odredbe ovog člana odgovarajuće se primjenjuju i u slučaju stavljanja u drugi carinski postupak (uz ispunjenje uvjeta za taj postupak, vidi i član 28.) robe koja je privremeno uvezena na način propisan članom 7. ovog Uputstva, s tim da se u polje 40 carinske prijave unosi sljedeće: "druga radnja".

Član 12.

(Prijavljivanje robe za privremeni uvoz uz potpuno oslobađanje od plaćanja uvoznih dažbina na osnovu karneta ATA)

(1) Karnet ATA, u skladu sa Konvencijom, primjenjuje se za prijavljivanje robe za privremeni uvoz uz potpuno oslobađanje od plaćanja uvoznih dažbina, što uključuje i rezervne dijelove i opremu uvezenu radi održavanja i popravke robe koja je stavljena u privremeni uvoz (vidi član 6. stav (1) tačka l)).

(2) Karnet ATA ne može se koristiti za privremeni uvoz prijevoznih sredstava (Aneks C), kao ni za privremeni uvoz uz djelimično oslobađanje od plaćanja uvoznih dažbina shodno Aneksu E Konvencije.

(3) Provođenje postupka privremenog uvoza, privremenog izvoza i carinskog tranzita na osnovu karneta ATA, druga izuzeća od primjene karneta ATA pored izuzeća navedenih u stavu (2) ovog člana, kao i druga pitanja u vezi carinskog postupka po karnetu ATA regulirana su Uputstvom o provođenju carinskog postupka po karnetu ATA.

Član 13.

(Carinska prijava kao zahtjev i odobrenje za privremeni uvoz uz potpuno oslobađanje od plaćanja uvoznih dažbina)

(1) Prijavljivanje robe za privremeni uvoz uz potpuno oslobađanje od plaćanja uvoznih dažbina, u skladu sa članom 300. stav 3. tačka (c) Odluke, vrši se podnošenjem carinske prijave za privremeni uvoz (IM5) i to:

- a) kada nisu ispunjeni uvjeti za prijavljivanje robe za navedeni postupak drugom radnjom, ili usmenom prijavom, ili na osnovu karneta ATA (čl. 7., 8. i 12.),
- b) za robu u vezi koje se traži povrat dažbina, odnosno za robu koja podliježi zabrani ili ograničenju ili nekoj drugoj mjeri (član 6. stav (3)),
- c) za prijevozna sredstva za privatnu upotrebu radi obavljanja posla ili studiranja iz člana 22. stav (1) ovog Uputstva,
- d) kada to traži korisnik privremenog uvoza,
- e) u drugim slučajevima u kojima nije potrebno pismeno odobrenje za privremeni uvoz uz potpuno oslobađanje od plaćanja uvoznih dažbina na obrascu iz Priloga 43 Odluke.

(2) Podnošenje carinske prijave za privremeni uvoz uz potpuno oslobađanje od plaćanja uvoznih dažbina u slučajevima iz stava (1) ovog člana smatra se zahtjevom, a njeno prihvatanje od strane nadležnog carinskog ureda odobrenjem za taj postupak. Carinska prijava, shodno članu 301. tačka (b) druga alineja Odluke, podnosi se carinskom uredu (carinska ispostava) nadležnom za mjesto gdje se roba treba koristiti.

(3) U slučajevima iz stava (1) ovog člana, bez odstupanja od člana 127. Odluke, uz carinsku prijavu prilaže se i dokument sa podacima iz člana 302. stav 2. Odluke, osim ako se takvi podaci za postupak smatraju nepotrebnim ili se mogu unijeti u carinsku prijavu. Ovaj dokument može se sačiniti na "Dodatnom obrascu za privremeni uvoz na osnovu carinske prijave IM5" iz Priloga 2. ovog Uputstva.

(4) Carinska prijava kojom se razdužuje privremeni uvoz odobren u slučajevima iz stava (1) ovog člana, podnosi se carinskom uredu kod kojeg je taj postupak i započeo po carinskoj prijavi IM5, koji ured se smatra i nadzorni i otpusni carinski ured u tom postupku. Uz carinsku prijavu kojom se razdužuje privremeni uvoz podnose se dokumenta propisana čl. 125. do 128. Odluke i druga eventualno potrebna dokumenta, ovisno od situacije.

Član 14.

(Zahtjev i odobrenje u pismenoj formi za privremeni uvoz uz potpuno oslobađanje od plaćanja uvoznih dažbina)

(1) Zahtjev za odobravanje privremenog uvoza uz potpuno oslobađanje od plaćanja uvoznih dažbina u pismenoj formi podnosi se na obrascu iz Priloga 43 Odluke, i to:

- a) za prijevozna sredstva koja se privremeno uvoze u skladu sa članom 358. stav 1. tačka (b) i stav 2. Odluke, odnosno iz člana 22. stav (6) ovog Uputstva,
- b) za robu iz člana 375. Odluke (vidi član 6. stav (1) tačka m)),

- c) u slučajevima kada to traži korisnik privremenog uvoza uz potpuno oslobađanje od plaćanja uvoznih dažbina (npr. u situacijama sukcesivnog uvoza robe po istom osnovu i za istu namjenu, npr. za isti sajam ili u nekom drugom slučaju).

(2) Podaci navedeni u zahtjevu iz stava (1) ovog člana trebaju biti dovoljni, razumljivi i tačni, a naročito u pogledu namjene privremenog uvoza, robe i mogućnosti njene identifikacije i pri ponovnom izvozu, kako bi se moglo provjeriti da li su ispunjeni propisani uvjeti za odobravanje traženog postupka. Uz zahtjev, taksiran propisanom administrativnom taksom, podnose se dokumenta neophodna za donošenje odobrenja za traženi postupak.

(3) U slučajevima iz stava (1) ovog člana pismeno odobrenje za privremeni uvoz uz potpuno oslobađanje od plaćanja uvoznih dažbina, na obrascu iz Priloga 43 Odluke, donosi Odsjek za carine pri regionalnom centru nadležnom prema mjestu gdje se roba treba koristiti. Ako će se privremeno uvezena roba koristiti u više različitih mjesta, odobrenje donosi Odsjek za carine pri regionalnom centru nadležnom prema mjestu gdje će se roba prvo koristiti.

(4) Kod stavljanja robe u postupak privremenog uvoza uz potpuno oslobađanje od plaćanja uvoznih dažbina u slučajevima iz stava (1) ovog člana i razduživanja tog postupka, odgovarajuće primjenjuje se član 18. stav (1) i (2) ovog Uputstva.

GLAVA III. PRIVREMENI UVOZ UZ DJELIMIČNO OSLOBAĐANJE OD PLAĆANJA UVOZNIH DAŽBINA

Član 15.

(Privremeni uvoz uz djelimično oslobađanje od plaćanja uvoznih dažbina)

(1) Privremeni uvoz uz djelimično oslobađanje od plaćanja uvoznih dažbina, u skladu sa članom 1. tačka a) Aneksa E Konvencije i članom 138. Zakona, može se odobriti za:

- a) robu koja je obuhvaćena odredbama drugih Aneksa Konvencije i odredbama čl. 352. do 375. Odluke, koja ne ispunjava uvjete za privremeni uvoz uz potpuno oslobađanje od plaćanja uvoznih dažbina propisanih tim odredbama,
- b) drugu robu koja se uvozi za privremenu upotrebu (npr. za svrhe proizvodnje ili izvođenje radova ili drugo), a koja nije obuhvaćena odredbama drugih Aneksa Konvencije i odredbama čl. 352. do 375. Odluke.

(2) Privremeni uvoz uz djelimično oslobađanje od plaćanja uvoznih dažbina, shodno članu 351. stav 2. Odluke, ne može se odobriti za robu široke potrošnje.

Član 16.

(Zahtjev i odobrenje u pismenoj formi za privremeni uvoz uz djelimično oslobađanje od plaćanja uvoznih dažbina)

(1) Zahtjev za odobravanje privremenog uvoza uz djelimično oslobađanje od plaćanja uvoznih dažbina u pismenoj formi podnosi se na obrascu iz Priloga 43 Odluke u sljedećim slučajevima:

- a) za prijevozna sredstva koja se privremeno uvoze a nisu ispunjeni uvjeti za privremeni uvoz istih uz potpuno oslobađanje od plaćanja uvoznih dažbina propisanih odredbama Aneksa C Konvencije i odredbama čl. 352. i 355. do 359. Odluke; osim prijevoznih sredstava koja se privremeno uvoze po osnovu ugovora o operativnom zakupu a ne radi se o situaciji iz tačke b) ovog stava (vidi član 17. stav (1) i član 19.),
- b) kod sukcesivnog uvoza robe po jednom poslu (npr. po jednom ugovoru o operativnom zakupu predviđena je privremena upotreba više mašina ili druge robe, a koje se privremeno ne uvoze odjedanput),
- c) u slučajevima kada to traži korisnik privremenog uvoza uz djelimično oslobađanje od plaćanja uvoznih dažbina.

(2) Podaci navedeni u zahtjevu iz stava (1) ovog člana trebaju biti dovoljni, razumljivi i tačni, naročito u pogledu namjene za privremeni uvoz te robe i mogućnosti njene identifikacije i pri ponovnom izvozu, kako bi se

moglo provjeriti da li su ispunjeni propisani uvjeti za odobravanje traženog postupka. Uz zahtjev, taksiran propisanom administrativnom taksom, podnose se dokumenta neophodna za donošenje odobrenja za traženi postupak privremenog uvoza.

(3) U slučajevima iz stava (1) ovog člana pismeno odobrenje za privremeni uvoz uz djelimično oslobađanje od plaćanja uvoznih dažbina, na obrascu iz Priloga 43 Odluke, donosi Odsjek za carine pri regionalnom centru nadležnom prema mjestu gdje se roba treba koristiti. Ako će se privremeno uvezena roba koristiti u više različitih mjesta, odobrenje donosi Odsjek za carine pri regionalnom centru nadležnom prema mjestu gdje će se roba prvo koristiti.

Član 17.

(Izuzeci u vezi privremenog uvoza uz djelimično oslobađanje od plaćanja uvoznih dažbina)

(1) Privremeni uvoz uz djelimično oslobađanje od plaćanja uvoznih dažbina u slučaju operativnog zakupa sa rokom zakupa dužim od 24 mjeseca može se, shodno članu 136. stav 2. Zakona, odobriti najduže do 24 mjeseca, neovisno što rok operativnog zakupa traje duže.

(2) Kada je u pitanju ugovor o finansijskom lizingu ili drugi ugovor kojim je predviđeno da se po izmirenju finansijskih obaveza postaje vlasnik, odnosno na drugi način prenosi pravo vlasništva, to prilikom uvoza robe koja je predmet takvog ugovora i ne postoji namjena njenog ponovnog izvoza (vraćanja u inostranstvo), čime nije ni ispunjen osnovni uvjet za privremeni uvoz propisan članom 133. Zakona. Stoga se nad takvom robom i ne može sprovesti postupak privremenog uvoza, već postupak stavljanja u slobodan promet.

Član 18.

(Prijavljivanje za i razduživanje privremenog uvoza uz djelimično oslobađanje od plaćanja uvoznih dažbina po odobrenju u pismenoj formi)

(1) Roba iz člana 16. stav (1) ovog Uputstva za koju je izdato pismeno odobrenje za privremeni uvoz uz djelimično oslobađanje od plaćanja uvoznih dažbina na obrascu iz Priloga 43 Odluke, prijavljuje se za taj postupak podnošenjem carinske prijave IM5 prijavnom carinskom uredu navedenom u odobrenju, u roku važenja odobrenja, uz koju prijavu se prilažu dokumenta propisana članom 127. Odluke.

(2) Carinska prijava kojom se razdužuje postupak iz stava (1) ovog člana podnosi se otpusnom carinskom uredu u roku za ponovni izvoz određenom u odobrenju, a uz istu se, ovisno od situacije, prilažu dokumenta propisana čl. 125. do 128. Odluke, odgovarajući obračun carinskog duga iz člana 32. ovog Uputstva, te druga eventualno potrebna dokumenta (vidi npr. čl. 27. i 28.).

(3) Postupak privremenog uvoza uz djelimično oslobađanje od plaćanja uvoznih dažbina ne može biti razdužen dok carinski dug nastao u tom postupku ne bude obračunat u skladu sa članom 32. ovog Uputstva i plaćen, uključujući i kompenzatornu kamatu u slučajevima u kojima se ta kamata naplaćuje (vidi član 34.).

Član 19.

(Carinska prijava kao zahtjev i odobrenje za privremeni uvoz uz djelimično oslobađanje od plaćanja uvoznih dažbina)

(1) Prijavljivanje robe za privremeni uvoz uz djelimično oslobađanje od plaćanja uvoznih dažbina, u skladu sa članom 300. stav 3. tačka (c) Odluke, u svim drugim slučajevima, osim u slučajevima iz člana 16. stav (1) ovog Uputstva, vrši se podnošenjem carinske prijave za privremeni uvoz (IM5).

(2) Podnošenje carinske prijave za privremeni uvoz uz djelimično oslobađanje od plaćanja uvoznih dažbina u slučajevima iz stava (1) ovog člana smatra se zahtjevom, a njeno prihvatanje od strane nadležnog carinskog ureda odobrenjem za taj postupak. Carinska prijava, shodno članu 301. tačka (b) druga alineja Odluke, podnosi se carinskom uredu (carinska ispostava) nadležnom za mjesto gdje se roba treba koristiti.

(3) Pri stavljanju robe u postupak iz stava (1) ovog člana i razduživanju tog postupka, ovisno od situacije, odgovarajuće se primjenjuje član 13. stav (3) i (4), član 16. stav (2), član 17. i član 18. stav (2) i (3) ovog Uputstva.

GLAVA IV - POSEBNOSTI PRIVREMENOG UVOZA DRUMSKIH PRIJEVOZNIH SREDSTAVA UZ POTPUNO OSLOBAĐANJE OD PLAĆANJA UVOZNIH DAŽBINA

Član 20.

(Privremeni uvoz uz potpuno oslobađanje od plaćanja uvoznih dažbina prijevoznih sredstava, rezervnih dijelova i opreme)

(1) Shodno Aneksu C Konvencije, te odredbama čl. 352., 355. do 359. i 374. Odluke, može se koristiti privremeni uvoz uz potpuno oslobađanje od plaćanja uvoznih dažbina:

- a) prijevoznih sredstava sa redovnom stranom registracijom za komercijalnu ili privatnu upotrebu, zajedno sa njihovim normalnim rezervnim dijelovima, dodacima i opremom ukrcanom na vozilo (uključujući specijalnu opremu za utovar, istovar, rukovanje i zaštitu tereta), koje uvozi lice sa sjedištem, odnosno prebivalištem van carinskog područja Bosne i Hercegovine,
- b) rezervnih dijelova i opreme radi popravke prijevoznih sredstava kojima je već odobren privremeni uvoz, isključivo koji su nužni za popravak i održavanje, uključujući remont, podešavanje i očuvanje prijevoznog sredstva stavljenog u privremeni uvoz, pri čemu se ne dopušta stvaranje rezervi rezervnih dijelova na prijevoznom sredstvu ili u carinskom području Bosne i Hercegovine.

(2) Privremeni uvoz rezervnih dijelova i opreme iz stava (1) tačka b) ovog člana korisnik privremenog uvoza može prijaviti na način propisan čl. 12. ili 13. ovog Uputstva (na osnovu karneta ATA ili podnošenjem carinske prijave IM5). Zamijenjeni dijelovi i oprema koja se ponovno ne izveze podliježe plaćanju carinskog duga, osim kada se njima raspolaže na neki od načina propisanih članom 14. Konvencije, odnosno članom 28. stav (2) ovog Uputstva koji ne dovodi do plaćanja carinskog duga.

Član 21.

(Privremeni uvoz uz potpuno oslobađanje od plaćanja uvoznih dažbina drumskih prijevoznih sredstava sa redovnom stranom registracijom za privatnu upotrebu)

(1) Privremeni uvoz uz potpuno oslobađanje od plaćanja uvoznih dažbina prijevoznog sredstva sa redovnom stranom registracijom za privatnu upotrebu može koristiti strani državljanin koji ima prebivalište van carinskog područja Bosne i Hercegovine (bilo u državi registracije ili u nekoj trećoj državi), kao i državljanin Bosne i Hercegovine sa prebivalištem u Bosni i Hercegovini koji ima uobičajeno mjesto boravka van carinskog područja Bosne i Hercegovine zbog privatnih ili profesionalnih razloga (što dokazuje odgovarajućim dokumentom, npr. radnom dozvolom, dokumentom o zdravstvenom osiguranju ili o ostvarivanju ličnih primanja, ili dozvolom boravka i slično).

(2) Prijevozno sredstvo iz stava (1) ovog člana prijavljuje se za privremeni uvoz u skladu sa članom 7. ovog Uputstva.

(3) Prijevozno sredstvo privremeno uvezeno za privatnu upotrebu, ne smije se dati u zakup, posuditi ili dati na upotrebu drugim licima u carinskom području Bosne i Hercegovine.

Član 22.

(Privremeni uvoz uz potpuno oslobađanje od plaćanja uvoznih dažbina drumskih prijevoznih sredstava za privatnu upotrebu radi obavljanja posla, studiranja i u drugim slučajevima)

(1) Shodno članu 5. tačka (b) Aneksa Konvencije i članu 358. stav 1. tačka (a) Odluke, drumsko prijevozno sredstvo uz potpuno oslobađanje od plaćanja uvoznih dažbina može privremeno uvesti fizičko lice sa prebivalištem van carinskog područja Bosne i Hercegovine u privatne svrhe isključivo radi obavljanja poslova u određenom vremenskom trajanju, odnosno u roku iz člana 359. stav 1. tačka (c) alineja druga Odluke, ili student koji ostaje u carinskom području Bosne i Hercegovine radi studiranja u roku iz člana 359. stav 1. tačka (c) alineja prva Odluke.

(2) U slučajevima iz stava (1) ovog člana, prijevozno sredstvo prijavljuje se za navedeni postupak privremenog uvoza u skladu sa članom 13. ovog Uputstva, carinskom uredu nadležnom prema mjestu gdje se roba treba koristiti (mjesto registrovanog privremenog boravka). Uz carinsku prijavu IM5, između ostalog, podnosi se i odgovarajući dokument iz stava (3) ovog člana (ovisno koja situacija je u pitanju).

(3) U svrhe odobravanja privremenog uvoza u slučaju iz stava (1) ovog člana, carinskom uredu neophodno je dokazati sljedeće:

- a) obavljanje određenog posla sa preciziranim trajanjem u carinskom području Bosne i Hercegovine, dokazuje se ugovorom o radu za određeni vremenski period i odobrenjem za privremeni boravak, odnosno boravak, izdatim od nadležnog organa,
- b) status studenta u carinskom području Bosne i Hercegovine, dokazuje se potvrdom o studiranju i odobrenjem za privremeni boravak, odnosno boravak izdatim od nadležnog organa.

(4) Privremeni uvoz prijevoznog sredstva u svrhu studiranja nadležni carinski ured može odobriti za vremenski period tokom kojeg student ostaje u carinskom području Bosne i Hercegovine radi studiranja, tj. privremeni uvoz se odobrava do datuma navedenog u važećoj potvrdi o studiranju (rok za ponovni izvoz) koji rok se unosi u polje D/J (peti red) carinske prijave IM5 i u inspeksijski akt te prijave (vidi i član 30.).

(5) Kod odobravanja privremenog uvoza radi obavljanja određenog posla sa preciziranim trajanjem u carinskom području Bosne i Hercegovine, odgovarajuće primjenjuje se stav (4) ovog člana, s tim da treba priložiti i dokumenta iz stava (3) tačka a) ovog člana. U navedenom slučaju, shodno članu 359. stav 1. tačka (c) alineja druga Odluke, period na koji se može odobriti privremeni uvoz uz potpuno oslobađanje od plaćanja uvoznih dažbina je period u kojem korisnik tog postupka boravi u carinskom području Bosne i Hercegovine isključivo radi izvršavanja njegovog posla (vidi i član 30.).

(6) Odobrenje za privremeni uvoz prijevoznog sredstva uz potpuno oslobađanje od plaćanja uvoznih dažbina, u svrhe i pod uvjetima iz člana 7. Aneksa C Konvencije i člana 358. stav 1. tačka (b) i stav 2. Odluke, donosi nadležni carinski organ iz člana 14. stav (3) ovog Uputstva, na obrascu iz Priloga 43 Odluke. U slučaju sistematskog korištenja prijevoznog sredstva prema članu 358. stav 2. Odluke, odnosno prijevozno sredstvo može, shodno članu 9. stav 2. Aneksa C Konvencije, biti u privremenom uvozu u periodu, kontinuiranom ili ne, sveukupno od šest mjeseci (dakle neovisno što eventualno povremeno i napušta carinsko područje Bosne i Hercegovine) za svaki period od 12 mjeseci.

(7) Kod stavljanja robe u postupak privremenog uvoza uz potpuno oslobađanje od plaćanja uvoznih dažbina u slučajevima iz stava (6) ovog člana i razduživanja tog postupka, odgovarajuće primjenjuje se član 18. stav (1) i (2) ovog Uputstva.

(8) Shodno Aneksu C Konvencije i članu 357. stav 1. Odluke, fizičko lice sa prebivalištem u Bosni i Hercegovini uživat će povlastice privremenog uvoza prijevoznog sredstva uz potpuno oslobađanje od plaćanja uvoznih dažbina kada privatno koristiti strano prijevozno sredstvo samo povremeno i isključivo u posebno opravdanim situacijama (npr. iznenadna bolest nosioca registracije i slično), na osnovu naloga nosioca registracije, koji u trenutku upotrebe vozila također boravi u carinskom području Bosne i Hercegovine.

Član 23.

(Privremeni uvoz uz potpuno oslobađanje od plaćanja uvoznih dažbina rent-a-car vozila)

Kada se radi o prijevoznom sredstvu za privatnu upotrebu čiji je vlasnik firma za iznajmljivanje vozila sa sjedištem van carinskog područja Bosne i Hercegovine (rent-a-car), izuzetno ga može iznajmiti fizičkom licu koje ima prebivalište u Bosni i Hercegovini radi jednokratne upotrebe (da se vrati u Bosnu i Hercegovinu ili da napusti Bosnu i Hercegovinu), pod uvjetom da to lice ili službenik rent-a-car firme privremeno uvezeno vozilo odmah ponovno izveze u roku iz člana 357. stav 2. Odluke (ovisno od situacije). U navedenom slučaju, prijevozno sredstvo prijavljuje se za privremeni uvoz u skladu sa članom 7. ovog Uputstva.

Član 24.

(Privremeni uvoz drumskih prijevoznih sredstava uz potpuno oslobađanje od plaćanja uvoznih dažbina za komercijalnu upotrebu)

(1) Privremeni uvoz drumskih prijevoznih sredstava uz potpuno oslobađanje od plaćanja uvoznih dažbina za komercijalnu upotrebu može se, shodno članu 5. Aneksa A Konvencije i članu 355. Odluke, odobriti samo

pod uvjetom ako su ista registrovana van carinskog područja Bosne i Hercegovine i da ih uvozi i koristi lice koje je zaposleno van carinskog područja Bosne i Hercegovine. Ta prijevozna sredstva mogu ostati u privremenom uvozu za vrijeme potrebno za vršenje prijevozne radnje u vezi sa kojom je privremeno uvezeno.

(2) Samo izuzetno, lice sa sjedištem u Bosni i Hercegovini može koristiti komercijalno prijevozno sredstvo stranih registracija uz posebnu punomoć njegovog vlasnika. U tom slučaju, upotreba stranog prijevoznog sredstva (kao i upotreba priključnog prijevoznog sredstva strane registracije povezanog na drumsko prijevozno sredstvo registrovano u Bosni i Hercegovini, član 356. tačka (b) Odluke) podrazumijeva samo neophodne i opravdane radnje kako bi se obavila konkretna komercijalna operacija (npr. istovar robe) i da je ta upotreba u vezi sa svrhom privremenog uvoza. Takva mogućnost upotrebe je vezana isključivo za situaciju kada zbog nepredviđenih okolnosti (npr. kvara na vozilu, saobraćajne nezgode) ili nekog drugog objektivnog razloga domaći prijevoznik nije u mogućnosti iz druge države dopremiti robu, te za uspješno okončanje konkretnog posla prijevoza (koji je vezan za ulazak u i izlazak iz Bosne i Hercegovine) mora jednokratno iznajmiti strano vozilo (ili priključno vozilo) u koje pretovara robu (ili putnike) i dovozi je u Bosnu i Hercegovinu.

(3) Kod privremenog uvoza priključnog prijevoznog sredstva strane registracije, korisnik privremenog uvoza carinskom referatu na ulaznom graničnom prijelazu treba dokazati da se radi o jednokratnoj upotrebi priključnog prijevoznog sredstva zbog razloga navedenih u stavu (2) ovog člana, u kom slučaju se odobrava privremeni uvoz uz potpuno oslobađanje od plaćanja uvoznih dažbina bez podnošenja carinske prijave. Ukoliko postoji ugovor sa stranim vlasnikom prema kojem domaći prevoznik uz naknadu koristi priključno prijevozno sredstvo strane registracije, u tom slučaju to priključno prijevozno sredstvo podliježe privremenom uvozu uz djelimično oslobađanje od plaćanja uvoznih dažbina, te će se isto, po redovnom postupku provoza (uz TR prijavu), uputiti odredišnom carinskom uredu radi provođenja odgovarajućeg postupka. Na isti način postupa se i u slučaju kada prijevoznik ne može dokazati da se radi o jednokratnoj upotrebi a nije predočio ni prednje navedeni ugovor.

GLAVA V. ZAJEDNIČKE ODREDBE ZA GLAVU II, III i IV

ODJELJAK A - CARINSKA PRIJAVA

Član 25.

(Popunjavanje carinske prijave)

Carinska prijava kojom se roba prijavljuje za privremeni uvoz i za razduživanje tog postupka, popunjava se u skladu sa propisima kojima je regulirano pitanje podnošenja i popunjavanja carinskih prijava, uključujući i, gdje to odgovara, pravila navedena u članu 26., članu 32. stav (8) i u drugim odredbama ovog Uputstva.

Član 26.

(Ostala pravila kod popunjavanja carinske prijave)

Kod popunjavanja carinske prijave, pored člana 25. ovog Uputstva, primjenjuju se, gdje to odgovara, i sljedeća pravila,:

- a) u polju 2 (pošiljalac robe), kod primjene čl. 27. i 28. ovog Uputstva unose se podaci o stranom pošiljaocu robe,
- b) u polju 44 (dodatne informacije, priložene isprave, uvjerenja i odobrenja) upisuje se i:
 - 1) broj i datum pod kojim je prihvaćena položena garancija za obezbjeđenje plaćanja carinskog duga,
 - 2) podaci o pismenom odobrenju za privremeni uvoz izdatom na obrascu iz Priloga 43 Odluke, u slučajevima gdje je to odobrenje izdato,
 - 3) u slučajevima iz člana 27. ovog Uputstva, ovisno u kojem privremenom uvozu se vrši prijenos, upisati naznaku: "PRIJENOS PU/PO" ili "PRIJENOS PU/DO", te podatke o broju i datumu odluke o prijenosu,
- c) u polju D/J (peti red) carinske prijave IM5, kao i u inspekcijski akt te prijave, carinski ured unosi odobreni rok za ponovni izvoz, kao i odobreno produženje tog roka, uključujući i rok kod prijenosa privremenog uvoza iz člana 27. stav (3) i (5) ovog Uputstva.

ODJELJAK B - PRIJENOS I RAZDUŽIVANJE PRIVREMENOG UVOZA I ROK ZA PONOVI IZVOZ

Član 27.

(Prijenos privremenog uvoza)

(1) U skladu sa članom 87. Zakona, prava i obaveze korisnika privremenog uvoza mogu se, u izuzetnim slučajevima, uz pismenu suglasnost drugog korisnika, sukcesivno prenijeti na drugo lice koje ispunjava uvjete za korištenje privremenog uvoza za robu koja je u pitanju i namijenjena je ponovnom izvozu i prihvata obaveze prvog korisnika privremenog uvoza za tu robu.

(2) Neovisno da li je prvobitni privremeni uvoz za koji se traži prijenos odobren shodno čl. 13., 14., 16. ili 19. ovog Uputstva, prvi korisnik privremenog uvoza obavezan je, u redovnom upravnom postupku, pribaviti odluku o odobravanju prijenosa. Zahtjev za prijenos podnosi se Odsjeku za carine pri regionalnom centru koji je izdao odobrenje prvom korisniku za privremeni uvoz na obrascu iz Priloga 43 Odluke ako to odobrenje postoji, odnosno Odsjeku za carine pri regionalnom centru kojem organizaciono pripada carinski ured kod kojeg je postupak odobren na osnovu carinske prijave IM5 kao zahtjeva. Uz zahtjev za prijenos, između ostalog, mora biti priložena i pismena suglasnost drugog korisnika da prihvata prijenos i obaveze koje za njega nastaju po osnovu prijenosa, kao i pismena suglasnost vlasnika robe da drugi korisnik može raspolagati robom u prijenosu privremenog uvoza.

(3) Odluka o odobravanju prijenosa, između ostalog, sadrži podatke o prvobitnom korisniku privremenog uvoza i njegovom odobrenju za privremeni uvoz na obrascu iz Priloga 43 Odluke ako postoji, podatke o carinskoj prijavi IM5 prvobitnog korisnika privremenog uvoza i podatke o robi iz te prijave, podatke o drugom korisniku na koga se vrši prijenos, obaveze kod prijenosa prvobitnog i drugog korisnika privremenog uvoza, te preostalo vrijeme prvobitno odobrenog roka za ponovni izvoz (što uključuje i produženje tog roka eventualno odobrenog prije prijenosa). Odluka o prijenosu je za drugog korisnika istovremeno i odobrenje za korištenje prenesenog privremenog uvoza po istim elementima i uvjetima pod kojima je taj privremeni uvoz odobren prvom korisniku. Odluka o prijenosu privremenog uvoza prilaže se i sastavni je dio obe carinske prijave IM5 (i prvog i drugog korisnika) i odobrenja o privremenom uvozu na obrascu iz Priloga 43 Odluke prvog korisnika, ako postoji.

(4) Na osnovu odluke o prijenosu, drugi korisnik podnosi novu carinsku prijavu IM5 za privremeni uvoz (šifra postupka 5300 zbog informacione podrške prijenosa, vidi i član 26. tačka b) alineja 3) i stav (5) ovog člana), a ako je u odobrenju za privremeni uvoz na obrascu iz Priloga 43 Odluke prvog korisnika već bio odobren prijenos, onda carinsku prijavu IM5 podnosi na osnovu tog odobrenja. Drugi korisnik podnosi novu carinsku prijavu IM5 (postupak 5300) kod istog carinskog ureda koji je prihvatio carinsku prijavu IM5 prvog korisnika, koju prijavu taj ured može prihvatiti tek pošto prvobitni korisnik ispunji obaveze koje za njega proizilaze iz prenesenog privremenog uvoza. U navedenoj novoj carinskoj prijavi IM5, u polju 40 (prethodni dokument) upisuju se podaci o carinskoj prijavi IM5 prvog korisnika privremenog uvoza, a carinski ured u inspeksijskom aktu te prvobitne IM5 prijave, kao i na zadržanom primjerku te prijave, u svrhe razduživanja iste, navodi podatke o odluci o prenosu i podatke o novoj carinskoj prijavi IM5 (npr. "razduživanje, odluka o prijenosu PU/DO ili prenosu PU/PO broj: od, nova IM5 od").

(5) Kod prijenosa privremenog uvoza drugi korisnik nastavlja korištenje privremenog uvoza po istim elementima i uvjetima pod kojima je privremeni uvoz bio odobren prvom korisniku (radi se o jednom privremenom uvozu). Zbog prijenosa privremenog uvoza ne mijenja se ni prvobitno odobreni rok za ponovni izvoz, što znači da roba ostaje u privremenom uvozu na drugog korisnika za preostali period neiskorištenog prvobitno odobrenog roka za ponovni izvoz (što uključuje i produženje tog roka eventualno odobrenog prije prenosa), koji period nadležni carinski ured unosi u carinsku prijavu IM5 (polje D/J, peti red) drugog korisnika privremenog uvoza (vidi članak 26. točka c)).

(6) Kod prijenosa privremenog uvoza uz djelimično oslobađanje od plaćanja uvoznih dažbina, prvi korisnik tog postupka obavezan je izmiriti iznos uvoznih dažbina i PDV-a obračunat prema članu 32. ovog Uputstva za period u kojem je koristio robu za koju je odobren prijenos, koji iznos čini carinski dug (u daljem tekstu: carinski dug).

(7) Kada je izvršen prijenos privremenog uvoza uz djelimično oslobađanje od plaćanja uvoznih dažbina, za oba lica koja imaju odobrenje za korištenje postupka tokom istog mjeseca, imalac početnog odobrenja (prvi korisnik)

dužan je, shodno članu 139. stav 4. Zakona, platiti iznos dospjelog carinskog duga za cijeli taj mjesec za robu za koju je odobren prijenos.

(8) Ne odstupajući od stava (6) i (7) ovog člana, u slučaju prijenosa, drugi korisnik privremenog uvoza preuzima obaveze koje proizilaze iz privremenog uvoza, uključujući i obavezu ponovnog izvoza robe u odobrenom roku za ponovni izvoz, te obračun i plaćanje odgovarajućeg carinskog duga i kompenzatorne kamate gdje je primjenjiva (vidi član 34.).

(9) Ako drugi korisnik privremenog uvoza uz djelimično oslobađanje od plaćanja uvoznih dažbina robu stavlja u slobodan promet, dužan je platiti iznos carinskog duga koji odgovara razlici carinskog duga obračunatog po carinskoj prijavi IM5 po kojoj je predmetna roba prvi put stavljena u postupak privremenog uvoza (tj. prije prijenosa) i carinskog duga kojeg je platio prvi korisnik u skladu sa stavom (6) i (7) ovog člana. Uz navedeni carinski dug, drugi korisnik privremenog uvoza dužan je platiti i iznos kompenzatorne kamate (u slučajevima u kojima se ta kamata naplaćuje (vidi član 34.) za cijelo razdoblje privremenog uvoza (počev od prvobitnog stavljanja robe u privremeni uvoz do razduživanja istog stavljanjem robe u slobodan promet, dakle i za razdoblje kada je roba bila u privremenom uvozu kod prvog korisnika prije prijenosa).

(10) U slučajevima iz člana 29. stav (1) tačka b) i c) i stav (2) ovog Uputstva ne radi se o prijenosu privremenog uvoza, jer nije u pitanju jedan privremeni uvoz, nego se radi o razduživanju privremenog uvoza stavljanjem robe u drugo carinski odobreno postupanje ili upotrebu, koje započinje ispočetka za novog korisnika.

Član 28.

(Način razduživanja privremenog uvoza)

(1) Privremeni uvoz, u pravilu, razdužuje se (završava) ponovnim izvozom robe iz carinskog područja Bosne i Hercegovine.

(2) Shodno čl. 12. do 14. Konvencije i članu 86. Zakona, privremeni uvoz, osim ponovnim izvozom, može se, na zahtjev korisnika postupka, a uz suglasnost (prihvatanjem carinske prijave za razduživanje ili drugog propisanog dokumenta) carinskog ureda kod kojeg se završava postupak i uz ispunjenje propisanih uvjeta, razdužiti i:

- a) stavljanjem robe u slobodan promet,
- b) smještajem robe u slobodnu zonu ili smještajem u carinsko skladište, kada se roba prije ponovnog izvoza treba skladištiti ili podvrgnuti uobičajenim oblicima postupanja,
- c) stavljanjem robe u neki od ostalih postupaka sa obustavom plaćanja,
- d) stavljanjem u slobodan promet kada je, zbog nezgode ili više sile, roba u velikoj mjeri oštećena, uz naplatu carinskog duga na tu robu u oštećenom stanju u trenutku njenog stavljanja u slobodan promet,
- e) uništenjem ili potpunim gubitkom robe zbog nezgode ili više sile,
- f) uništenjem pod carinskim nadzorom, na teret korisnika privremenog uvoza,
- g) ustupanjem robe (bez naknade) carinskom organu u korist Bosne i Hercegovine.

(3) Kod razduživanja privremenog uvoza na način iz stava (2) ovog člana, osim u slučaju iz tačke b), mora se podnijeti pismena suglasnost vlasnika robe.

(4) Kod razduživanja privremenog uvoza na način iz stava (2) tačka b) i c) ovog člana, nadležni carinski organ dužan je dalje pratiti da li je roba nakon tog postupka ponovno izvezena, kako bi se obezbijedilo da eventualni carinski dug i kompenzatorna kamata budu plaćeni ako roba ne bude ponovno izvezena.

(5) Razduživanje privremenog uvoza stavljanjem robe u carinsko skladište ili smještajem u slobodnu zonu, nadležni carinski ured može odobriti u opravdanim slučajevima, npr. kada korisnik privremenog uvoza zbog opravdanih razloga ne može ponovno izvesti robu a nije odobreno dalje produženje roka za ponovni izvoz ili nema potrebe za dalje korištenje robe u postupku do njenog ponovnog izvoza ili se roba po nalogu vlasnika koji traži novog korisnika stavlja u carinsko skladište ili smješta u slobodnu zonu, i slično.

(6) U dokumenta ili evidencije na osnovu kojih se roba unosi u carinsko skladište ili smješta u slobodnu zonu ili stavlja u neki od ostalih postupaka sa obustavom plaćanja, osim u karnet ATA, u skladu sa članom 380. Odluke, unosi se oznaka "TA roba", koja oznaka pokazuje da je roba bila u privremenom uvozu, kako bi se

obezbijeđilo da eventualni carinski dug i kompenzatorna kamata budu plaćeni ako roba ne bude ponovno izvezena.

Član 29.

(Specifičnosti kod razduživanja privremenog uvoza uz djelimično oslobađanje od plaćanja uvoznih dažbina)

(1) Ako se privremeni uvoz uz djelimično oslobađanje od plaćanja uvoznih dažbina razdužuje stavljanjem robe u carinsko skladište (ili smještajem u slobodnu zonu, samo umjesto šifre postupka "71" je šifra "78"), pa nakon toga ista ne bude ponovno izvezena, nego se ponovo stavi u privremeni uvoz uz djelimično oslobađanje od plaćanja uvoznih dažbina ili u slobodan promet, razlikuju se sljedeće situacije:

- a) ako nakon carinskog skladištenja (7153) robu ponovno stavi u privremeni uvoz uz djelimično oslobađanje od plaćanja uvoznih dažbina isti (prvobitni) korisnik privremenog uvoza nad tom robom, podnosi novu carinsku prijavu IM5 (postupak 5371) i važe prvi elementi za obračun carinskog duga (elementi iz prve carinske prijave IM5), s tim da ukupan period tokom kojeg roba ostaje u privremenom uvozu ne prelazi 24 mjeseca (vidi član 30. stav (2), (4) i (5)). Ako isti korisnik, nakon ponovnog privremenog uvoza (5371), robu stavlja u slobodan promet postupa se po uobičajenim pravilima razduživanja tog postupka stavljanjem robe u slobodan promet (ima pravo odbiti iznos carinskog duga koji je platio po prvoj carinskoj prijavi IM5 (5300) i plaća kompenzatornu kamatu za svo vrijeme provedeno u postupku privremenog uvoza (dakle za vrijeme u postupku 5300, 7153 i 5371, vidi član 34. stav (1) tačka b)),
- b) ako postupak (5371) započinje novi korisnik (drugo lice) privremenog uvoza uz djelimično oslobađanje od plaćanja uvoznih dažbina, za tog korisnika važe novi elementi za obračun carinskog duga prema stanju robe na dan prihvatanja njegove carinske prijave IM5 i postupak teče ispočetka s uobičajenim pravilima tog postupka, jer je privremeni uvoz za prvog korisnika već bio završen stavljanjem robe u carinsko skladište. Ako drugi korisnik privremenog uvoza, nakon svog postupka 5371, robu stavlja u slobodan promet ne može od carinskog duga odbiti iznos koji je platio prvobitni korisnik privremenog uvoza koji je robu razdužio postupkom 7153,
- c) ako u situaciji navedenoj u tački a) ovog stava, nakon ponovnog privremenog uvoza (postupak 5371 istog korisnika), robu stavlja u slobodan promet drugo lice (kome je inostrani vlasnik prodao robu), a ne korisnik privremenog uvoza nad tom robom, u tom slučaju korisnik privremenog uvoza plaća carinski dug za svoj privremeni uvoz (postupak 5371), a lice koje stavlja robu u slobodan promet plaća carinski dug prema elementima koji odgovaraju stanju robe na dan njenog stavljanja u slobodan promet, od kojeg duga ne može odbiti iznos carinskog duga koji je platio prvobitni korisnik privremenog uvoza, a ne plaća kompenzatornu kamatu (jer se radi o novom postupku i novom imaoću postupka kao da se roba tada uvozi). Isto važi i kada nakon postupka 7153 i 5300 robu stavlja u slobodan promet drugo lice.

(2) Ako se privremeni uvoz uz djelimično oslobađanje od plaćanja uvoznih dažbina prvog korisnika (postupak 5300) razdužuje stavljanjem robe u isti postupak na drugo lice (drugi korisnik) kome je vlasnik robe istu dao na korištenje (šifra postupak 5300 zbog informatičke podrške istog) za prvog korisnika razdužuje se privremeni uvoz uz obavezu plaćanja carinskog duga nastalog u njegovom postupku (5300) i ne plaća kompenzatornu kamatu. Za drugog korisnika teče novi postupak privremenog uvoza uz djelimično oslobađanje od plaćanja uvoznih dažbina uz primjenu uobičajenih pravila za taj postupak (uključujući i kompenzatornu kamatu za period trajanja njegovog postupka 5300 ako robu stavi u slobodan promet), a ne može od carinskog duga bilo kada odbiti iznos carinskog duga kojeg je platio prvi korisnik u svom postupku 5300. U carinskoj prijavi IM5 drugog korisnika, u polju 40 (prethodni dokument) upisuju se podaci o carinskoj prijavi IM5 prvog korisnika privremenog uvoza, a carinski ured u inspekcijском aktu IM5 prijave prvog korisnika, kao i na zadržanom primjerku te prijave, u svrhe razduživanja iste, navodi podatke o carinskoj prijavi IM5 drugog korisnika (npr. "razduženo sa IM5 od").

(3) Za privremeno uvezenu robu iz člana 5. Aneksa B.1 Konvencije i člana 373. stav 1. Odluke, koja se iskoristi, uništi ili besplatno podijeli posjetiocima priredbe (definicija "priredbe" data u članu 1. navedenog Aneksa) prema uvjetima iz tog člana, u ukupnoj vrijednosti i količini koja, prema procjeni nadzornog carinskog ureda, odgovara karakteru priredbe, broju posjetilaca priredbe i obimu učešća stranog izlagača, odobrava se carinjenje bez uvoznih carina i poreza i bez primjene uvoznih zabrana i ograničenja, u skladu sa navedenim članom. Za navedenu robu, ako je ista stavljena u postupak privremenog uvoza po carinskoj prijavi IM5, radi razduživanja tog postupka, korisnik privremenog uvoza otpusnom carinskom uredu podnosi carinsku prijavu za stavljanje u slobodan promet uz oslobađanje od plaćanja uvoznih dažbina i poreza. Navedeno se ne odnosi na alkoholna pića, duhanske proizvode i goriva.

(4) Ako je roba iz stava (3) ovog člana stavljena u postupak privremenog uvoza po karnetu ATA, kod razduživanja tog postupka za istu postupa se na način propisan Uputstvom o provođenju carinskog postupka po karnetu ATA.

Član 30.

(Rok za ponovni izvoz)

(1) Rok za ponovni izvoz privremeno uvezene robe uz potpuno oslobađanje od plaćanja uvoznih dažbina propisan prema pojedinačnim Aneksima Konvencije i odredbama Odluke je:

- a) za robu namijenjenu izlaganju ili upotrebi na izložbama, sajmovima, sastancima ili sličnim priredbama iz Aneksa B.1 i člana 373. i Priloga 49 Odluke: najmanje šest mjeseci. Ako se radi o više priredbi na kojima će biti izložena ova roba, maksimalni rok je godina dana.
Kada se radi: o umjetničkim djelima, kolekcionarskim predmetima i antikvitetima iz Priloga 49 Odluke; o robi osim novoprodukovane robe koja se privremeno uvozi za izložbu sa namjerom potencijalne prodaje; o robi koja se ne može uvesti kao uzorak, a pošiljalac, sa svoje strane, želi da robu proda, a primalac može odlučiti da je kupi nakon pregleda; rok za ponovni izvoz je: dva mjeseca,
- b) za stručnu opremu iz Aneksa B.2 i člana 366. Odluke: najmanje 12 mjeseci,
- c) za kontejnere, palete, ambalažu, uzorke i drugu robu koja se uvozi u vezi sa nekom komercijalnom operacijom iz Aneksa B.3 i čl. 353., 354., 365., 368., 370. i 371. Odluke: najmanje šest mjeseci,
- d) za robu koja se uvozi za proizvodne djelatnosti iz Aneksa B.4 i čl. 369. i 372. Odluke:
 - 1) za matrice, kalupe, blokove, ploče, crteže, planove, modele i ostale slične artikle, predmete za mjerenje, kontrolu i provjere, te druge slične predmete, specijalne alate i instrumente, koji se uvoze za upotrebu u proizvodnim procesima: najmanje 12 mjeseci,
 - 2) za rezervna (zamjenska) sredstva za proizvodnju: najmanje šest mjeseci,
- e) za robu za potrebe obrazovanja, nauke i kulture iz Aneksa B.5 i čl. 361. i 367. Odluke: najmanje 12 mjeseci,
- f) za lične predmete putnika i robu uvezenu u sportske svrhe iz Aneksa B.6 i člana 360. Odluke:
 - 1) za lične predmete: najkasnije do trenutka, kada lice, koje ih je uvezlo, napusti teritoriju privremenog uvoza,
 - 2) za robu uvezenu u sportske svrhe: najmanje 12 mjeseci,
- g) za materijale turističke promocije iz Aneksa B.7: najmanje 12 mjeseci,
- h) za robu uvezenu u pograničnom prometu iz Aneksa B.8 i člana 364. stav 2. Odluke: najmanje 12 mjeseci, dok oprema koja je namijenjena obradi zemlje mora biti ponovno izvezena nakon završetka radova,
- i) za robu uvezenu u humanitarne svrhe iz Aneksa B.9 i čl. 362. i 363. Odluke:
 - 1) za medicinsku, hiruršku i laboratorijsku opremu: rok za ponovni izvoz određuje se u skladu sa potrebama,
 - 2) za pošiljke pomoći: najmanje 12 mjeseci,
- j) za životinje iz Aneksa D i člana 364. stav 1. Odluke: najmanje 12 mjeseci,
- k) za prijevozna sredstva iz Aneksa C Konvencije i čl. 355. do 359. Odluke:
 - 1) za prijevozno sredstvo za komercijalnu upotrebu: vrijeme potrebno za vršenje odnosne radnje u vezi sa prijevozom, tj. ta sredstva bit će ponovno izvezena onda kada prijevozna radnja radi koje je bilo uvezeno bude završena,
 - 2) za željeznička prijevozna sredstva: 12 mjeseci,
 - 3) za privatno korištena plovila: 18 mjeseci,
 - 4) za prijevozna sredstva za privatnu upotrebu: šest mjeseci za svaki period od 12 mjeseci,
 - 5) za prijevozna sredstva koja koriste studenti i lice koje obavlja poslove preciziranog trajanja: za vrijeme studiranja, odnosno za vrijeme boravka u Bosni i Hercegovini isključivo radi obavljanja određenih poslova.

(2) Za robu uvezenu uz djelimično oslobađanje od plaćanja uvoznih dažbina i poreza iz Aneksa E, rok za ponovni izvoz može iznositi najduže 24 mjeseca (vidi i stav (5) ovog člana).

(3) Rok za ponovni izvoz u slučajevima iz čl. 13. i 19. ovog Uputstva određuje carinski ured kojem se u skladu sa tim odredbama podnosi carinska prijava IM5 kao zahtjev, dok rok za ponovni izvoz u slučajevima u kojima se donosi pismeno odobrenje na obrascu iz Priloga 43. Odluke (čl. 14. i 16.) određuje donosilac tog odobrenja.

(4) Rok za ponovni izvoz privremeno uvezene robe određuje se imajući u vidu vrstu robe, svrhu privremenog uvoza (npr. sajam, izložba, uzorak, stručna oprema, oprema za testiranje, prezentacija, za izvođenje radova ili korištenja u proizvodnji i drugo), namjeravanu dužinu boravka robe u Bosni i Hercegovini, odnosno vrijeme koje se smatra primjerenim za postizanje prvobitne namjene privremenog uvoza, a u skladu sa rokom propisanim u odgovarajućem Aneksu Konvencije i odredbama Odluke (vidi stav (1) ovog člana) po kojem se odnosna roba privremeno uvozi, koji rokovi se uzimaju u obzir i kod produženja roka za ponovni izvoz (vidi stav (5) i (7) ovog člana). Može se odrediti kraći rok za ponovni izvoz od propisanog, uz suglasnost ili na zahtjev korisnika privremenog uvoza.

(5) U slučajevima privremenog uvoza uz potpuno oslobađanje od plaćanja uvoznih dažbina u kojima, pojedinim Aneksima Konvencije i odredbama Odluke, nije propisan rok do kojeg roba najduže može ostati u tom postupku (maksimalni rok), ukupan period u kojem roba može ostati u privremenom uvozu u cilju iste namjene i pod odgovornošću istog korisnika postupka, shodno članu 350. stav 2. Odluke, ne prelazi 24 mjeseca, čak i kada je privremeni uvoz završen stavljanjem odnosne robe u drugi carinski postupak sa obustavom plaćanja pa je nakon toga ponovo stavljena u privremeni uvoz. Isto važi i kod privremenog uvoza uz djelimično oslobađanje od plaćanja uvoznih dažbina (vidi i stav (2) ovog člana).

(6) Rok za ponovni izvoz počinje teći od dana stavljanja robe u privremeni uvoz (vidi i član 27. stav (5)). Taj rok carinski ured unosi u polje D/J (peti red) carinske prijave IM5, kao i u inspekcijski akt te prijave.

(7) O produženju roka za ponovni izvoz, uzimajući u obzir i odredbe stava (4) i (5) ovog člana, odlučuje carinski ured kod kojeg je roba stavljena u postupak privremenog uvoza (tj. koji je prihvatio carinsku prijavu IM5), zabilješkom na zahtjevu, ako istom udovoljava, koja zabilješka treba da sadrži i odobreni produženi rok za ponovni izvoz. Ukoliko se zahtjevu ne udovoljava ili se zahtjevom traži produženje roka za ponovni izvoz preko maksimalno propisanog roka za odnosni slučaj privremenog uvoza predmet se dostavlja nadležnoj Grupi za procedure na rješavanje u redovnom upravnom postupku. Odobreni produženi rok za ponovni izvoz carinski ured unosi u odnosnu carinsku prijavu IM5 (polje D/J), kao i u inspekcijski akt te prijave.

(8) Nadležna Grupa za procedure, u skladu sa članom 136. stav 3. Zakona i članom 350. stav 2. drugi podstav Odluke, u izuzetnim okolnostima, a na zahtjev korisnika privremenog uvoza, može, u razumnim granicama, produžiti rok i nakon proteka 24 mjeseca za vrijeme tokom kojeg se roba ne koristi u skladu sa utvrđenim uvjetima, Izuzetne okolnosti, prema članu 350. stav 3. Odluke, znače svaki događaj zbog kojeg roba mora biti u daljnjoj upotrebi kako bi se ispunila prvobitna namjena privremenog uvoza.

(9) Zahtjev za produženje roka za ponovni izvoz, sa kopijom carinske prijave IM5 po kojoj je odnosna roba stavljena u privremeni uvoz i drugim dokumentima eventualno potrebnim za rješavanje zahtjeva, shodno članu 90. Zakona o upravnom postupku ("Službeni glasnik Bosne i Hercegovine", br. 29/02, 12/04, 88/07 i 93/09), podnosi se prije isteka prvobitno odobrenog roka za ponovni izvoz.

ODJELJAK C - OBEZBJEĐENJE I OBRAČUN CARINSKOG DUGA

Član 31.

(Obezbjedenje plaćanja
carinskog duga u privremenom uvozu)

(1) Shodno članu 85. i 181. Zakona, za prijavljivanje robe za privremeni uvoz korisnik tog postupka dužan je, uz carinsku prijavu IM5 po kojoj se roba stavlja u privremeni uvoz, položiti valjanu garanciju za obezbjeđenje plaćanja carinskog duga za svo vrijeme trajanja privremenog uvoza (svoju ili garanciju ovlaštenog zastupnika), osim u slučajevima navedenim u članu 378. stav 1. Odluke, odnosno u Prilogu 50 Odluke. Garancija za obezbjeđenje plaćanja carinskog duga, kojom se obezbjeđuje da će bilo kakav carinski dug koji nastane u vezi sa robom biti plaćen, treba biti prethodno prihvaćena od nadležnog regionalnog centra u skladu sa propisima koji regulišu to pitanje.

(2) Korisnik privremenog uvoza, neovisno od vrste položene garancije, odgovoran je da carinski dug tokom cijelog perioda trajanja privremenog uvoza bude osiguran i u slučaju nastanka istog plaćen.

(3) Garancija iz stava (1) ovog člana ne može se osloboditi, odnosno razdužiti prije razduživanja privremenog uvoza i naplate carinskog duga eventualno nastalog u tom postupku.

Član 32.

(Obračun i plaćanje carinskog duga u privremenom uvozu uz djelimično oslobađanje od plaćanja uvoznih dažbina)

(1) U postupku privremenog uvoza uz djelimično oslobađanje od plaćanja uvoznih dažbina naplaćuje se carinski dug kojeg, prema članu 139. Zakona i članu 5. Aneksa E Konvencije, čine uvozne dažbine i PDV. Prema navedenim odredbama, iznos carinskog duga koji se treba platiti za robu koja je stavljena u privremeni uvoz uz djelimično oslobađanje od plaćanja uvoznih dažbina je 3% od iznosa carinskog duga (uvoznih dažbina i PDV-a) koji bi se platio za odnosnu robu ukoliko bi bila stavljena u slobodan promet onog dana kada je stavljena u privremeni uvoz uz djelimično oslobađanje od plaćanja uvoznih dažbina, za svaki mjesec ili dio mjeseca tokom kojeg je roba bila u tom postupku. Obračun carinskog duga vrši se po mjesecima, neovisno da li je roba korištena za puni mjesec ili samo za dio mjeseca (nekoliko dana), pri čemu se mjesec dana ne smatra kalendarski mjesec, nego, shodno članu 91. Zakona o upravnom postupku, razdoblje od mjesec dana počinje od dana kada je roba stavljena u postupak, a završava se na isti dan sljedećeg mjeseca (npr. ako je roba stavljena u privremeni uvoz 05.06.2012. razdoblje od mjesec dana završava se 05.07.2012. godine).

Primjer:

Ako je roba u postupku privremenog uvoza uz djelimično oslobađanje od plaćanja uvoznih dažbina bila u periodu od 27.06.2012. do 13.07.2012. godine, iznos carinskog duga (uvoznih dažbina i PDV-a) u tom postupku od 3 % se obračunava i plaća za period od jednog mjeseca, pošto je roba bila u tom postupku za dio jednog mjeseca. Ako je roba bila u navedenom postupku u periodu od 30.01.2012. do 02.07.2012. godine, iznos carinskog duga u tom slučaju se obračunava i plaća za šest mjeseci, pošto je roba bila u postupku punih pet mjeseci i dio šestog mjeseca.

(2) Po carinskoj prijavi IM5 po kojoj je uvozna roba stavljena u postupak privremenog uvoza uz djelimično oslobađanje od plaćanja uvoznih dažbina, u skladu sa članom 193. stav 1. tačka (b) Zakona, nastaje carinski dug, čiji iznos je naveden u polju 47 te prijave, koji iznos se ne knjiži, niti se naplaćuje u trenutku stavljanja robe u taj postupak, ali se obezbjeđuje valjanom garancijom tokom cijelog perioda trajanja navedenog postupka. Stvarni iznos carinskog duga nastalog u privremenom uvozu uz djelimično oslobađanje od plaćanja uvoznih dažbina, prema stavu (1) ovog člana, ovisi od stvarnog vremena trajanja tog postupka. Stoga će isti biti poznat tek na završetku tog postupka, kada se, shodno članu 7. stav 1. Aneksa E Konvencije, i utvrđuje (obračunava), te knjiži i naplaćuje odjednom (a ne mjesečno).

(3) Iznos carinskog duga koji se naplaćuje u postupku privremenog uvoza uz djelimično oslobađanje od plaćanja uvoznih dažbina, shodno članu 139. stav 2. Zakona i članu 6. Aneksa E Konvencije, ni u kom slučaju ne prelazi onaj iznos koji bi se naplatio da je odnosna roba bila stavljena u slobodan promet onog dana kada je stavljena u privremeni uvoz uz djelimično oslobađanje od plaćanja uvoznih dažbina.

(4) Uz carinsku prijavu kojom se razdužuje postupak privremenog uvoza uz djelimično oslobađanje od plaćanja uvoznih dažbina, deklarant podnosi i obračun carinskog duga stvarno nastalog u tom postupku, na obrascu iz Priloga 3. ili 4. ovog Uputstva, ovisno od situacije, koji obračun provjerava carinski ured.

(5) Kada se postupak privremenog uvoza uz djelimično oslobađanje od plaćanja uvoznih dažbina razdužuje ponovnim izvozom robe, carinski ured postupa na sljedeći način:

- a) provjerava obračun carinskog duga kojeg je deklarant podnio uz odnosnu carinsku prijavu na obrascu iz Priloga 3. ili 4. ovog Uputstva, ovisno od situacije, u četiri primjerka, te ukoliko je isti netačan izvršit će odgovarajuću ispravku na samom obračunu u svim primjercima, uz ovjeru ispravke,
- b) donosi rješenje o obračunu carinskog duga, a sastavni dio tog rješenja je obračun carinskog duga iz tačke a) ovog stava,
- c) u informacioni program "Račun" vrši knjigovodstveno evidentiranje prihoda po osnovu obračunatog carinskog duga kako je propisano propisom kojim je uređena primjena tog programa,
- d) po jedan primjerak rješenja i obračuna carinskog duga zadržava uz carinsku prijavu IM5 i odnosnu carinsku prijavu za ponovni izvoz, i njeni su sastavni dio,
- e) jedan primjerak rješenja sa obračunom carinskog duga dostavlja korisniku postupka (deklarantu), radi plaćanja,
- f) jedan primjerak rješenja (sa klauzulom izvršnosti) i obračun carinskog duga dostavlja i organizacionoj jedinici nadležnoj za praćenje uplata obračunatih indirektnih poreza koji su knjigovodstveno evidentirani u informacioni program "Račun".

(6) Odredbe stava (5) ovog člana odgovarajuće se primjenjuju i u drugim odgovarajućim slučajevima razduživanja postupka privremenog uvoza uz djelimično oslobađanje od plaćanja uvoznih dažbina podnošenjem odgovarajuće carinske prijave (npr. određeni slučajevi iz čl. 27. i 29. ovog Uputstva), osim kada se radi o stavljanju u slobodan promet robe privremeno uvezene uz djelimično oslobađanje od plaćanja uvoznih dažbina (vidi stav (8) ovog člana).

(7) Ako je u privremenom uvozu uz djelimično oslobađanje od plaćanja uvoznih dažbina koji je započet i nije okončan do početka primjene ovog Uputstva, carinski dug eventualno mjesečno obračunavan i plaćan (za svaki ili dio mjeseca u iznosu od 3%), u takvim slučajevima se dalje, počev od dana primjene ovog Uputstva, carinski dug neće naplaćivati na taj način, nego će se stvarni iznos carinskog duga u tom postupku obračunati i preostali dio tog duga naplatiti u cjelosti na završetku (razduživanju) tog postupka, s tim da preostali iznos carinskog duga mora biti obezbijeden valjanom garancijom do završetka navedenog postupka. Na završetku tog postupka, uz carinsku prijavu kojom se isti razdužuje, deklarant, u svakom konkretnom slučaju, na obrascu iz Priloga 4. ovog Uputstva, podnosi obračun carinskog duga (ukupno obračunati iznos carinskog duga za svo vrijeme trajanja tog postupka umanjen za iznos do tada plaćenog dijela tog duga kroz mjesečne uplate prema podacima iz programa "Račun" i dokaza o plaćanju). U tom slučaju carinski ured preuzima i radnje propisane stavom (5) ili (8) ovog člana, ovisno od situacije.

(8) U slučaju kada se roba iz privremenog uvoza uz djelimično oslobađanje od plaćanja uvoznih dažbina stavlja u slobodan promet (carinska prijava IM4) ili kada carinski dug nastane na neki drugi način, obračunava se, knjiži i naplaćuje cjelokupni iznos carinskog duga iz polja 47 carinske prijave IM5 za odnosnu robu, tj. iznos koji bi se naplatio da je odnosna roba bila stavljena u slobodan promet onog dana kada je stavljena u privremeni uvoz uz djelimično oslobađanje od plaćanja uvoznih dažbina, uključujući i kompenzatornu kamatu gdje je primjenljiva (vidi član 34.). Uz carinsku prijavu IM4, deklarant podnosi i obračun carinskog duga na obrascu iz Priloga 3. ili 4. ovog Uputstva, ovisno od situacije, u tri primjerka. Radi ispravnog obračuna carinskog duga u carinskoj prijavi IM4 (postupak 4053), pri popunjavanju polja 37 i 47 te prijave i provjere obračuna carinskog duga, postupa se kako slijedi:

- a) u drugoj potpodjeli polja 37 (postupak) deklarant unosi dodatnu šifru postupka "411", koja pozicioniranjem na polje 48 omogućava otvaranje polja za ručni unos obračunatih dažbina,
- b) u polju 47 (obračun indirektnih poreza) deklarant ručno unosi dažbine iz obračuna carinskog duga koji podnosi uz odnosnu IM4 prijavu,
- c) carinski ured provjerava obračun carinskog duga podnijet uz odnosnu carinsku prijavu IM4, te ukoliko je isti netačan vrši odgovarajuću ispravku na samom obračunu u svim primjercima, uz ovjeru ispravke, kao i ispravku podataka o istom unijetih u polje 47 odnosne prijave IM4 u informacionom sistemu,
- d) nakon završetka postupka po carinskoj prijavi IM4, carinski ured, u dva primjerka, štampa prijavu IM4 modifikovanu u skladu sa tačkom c) ovog stava i ovjerava, od čega jedan primjerak zadržava, a drugi primjerak uručuje deklarantu. Deklarantu vraća i jedan primjerak ovjerenog obračuna carinskog duga, a po jedan primjerak tog obračuna odlaže uz odnosnu carinsku prijavu IM4 i IM5, koji je sastavni dio tih prijava.

Član 33.

(Obračun carinskog duga u privremenom uvozu
uz potpuno oslobađanje od plaćanja uvoznih dažbina)

(1) Na robu stavljenju u postupak privremenog uvoza uz potpuno oslobađanje od plaćanja uvoznih dažbina ne naplaćuje se carinski dug, ali se isti obračunava (a ne knjiži se) na dan stavljanja robe u taj postupak i obezbjeđuje valjanom garancijom tokom cijelog perioda trajanja tog postupka.

(2) Prema odredbama člana 140. stav 1. Zakona i člana 379. stav 1. Odluke, samo se u slučaju kada se postupak privremenog uvoza uz potpuno oslobađanje od plaćanja uvoznih dažbina odobren za robu iz Aneksa B.1. Konvencije i člana 373. Odluke (roba namijenjena izložbi, manifestaciji i druge robe iz tog člana), razdužuje stavljanjem robe u slobodan promet ili kada carinski dug za tu robu nastane na drugi način, iznos carinskog duga utvrđuje na osnovu elemenata za obračun dažbina koji odgovaraju toj robi u trenutku prihvatanja carinske prijave za stavljanje u slobodan promet, odnosno u trenutku nastanka carinskog duga.

(3) U svim drugim slučajevima razduživanja postupka privremenog uvoza uz potpuno oslobađanje od plaćanja uvoznih dažbina stavljanjem robe u slobodan promet ili kada carinski dug nastane na drugi način, iznos tog duga se obračunava na osnovu elemenata za obračun dažbina koji odgovaraju toj robi u trenutku prihvatanja carinske prijave

po kojoj je ista stavljena u privremeni uvoz uz potpuno oslobađanje od plaćanja uvoznih dažbina. U tim slučajevima odovarajuće se primjenjuje i član 32. stav (8) ovog Uputstva, uz podnošenje obračuna carinskog duga na obrascu iz Priloga 5. ovog Uputstva, ukoliko je isti potreban (npr. ako se za odnosnu robu elementi za obračun carinskog duga u IM4 prijavi ne podudaraju sa istim elementima iz IM5 prijave).

(4) U slučajevima kada se privremeni uvoz uz potpuno oslobađanje od plaćanja uvoznih dažbina razdužuje stavljanjem robe iz tog postupka u slobodan promet ili carinski dug nastane na drugi način, odredbe mjerodavne za obračun i plaćanje uvoznih dažbina u tim slučajevima se, shodno članu 39. stav 6. i članu 63. Zakona o porezu na dodatu vrijednost ("Službeni glasnik BiH", br. 9/05, 35/05 i 100/08), primjenjuju i za obračun i plaćanje PDV-a.

Član 34.

(Kompenzatorna kamata u privremenom uvozu)

(1) U skladu sa članom 317. Odluke, kada carinski dug nastane u vezi uvozne robe iz postupka privremenog uvoza, na iznos uvoznih dažbina (ne i PDV-a) obračunava se kompenzatorna kamata. Kompenzatorna kamata obračunava se i naplaćuje u sljedećim slučajevima:

- a) kada se roba iz privremenog uvoza uz djelimično oslobađanje od plaćanja uvoznih dažbina stavlja u slobodan promet,
- b) kada je roba iz privremenog uvoza (bez obzira koji privremeni uvoz je u pitanju), osim robe iz stava (2) tačka b) ovog člana, prijavljena za drugo carinski odobreno postupanje ili upotrebu uz obustavu plaćanja uvoznih dažbina (npr. unos u carinsko skladište, smještaj u slobodnu zonu) i nakon toga stavljena u slobodan promet od istog korisnika, jer roba nije ponovno izvezena. U obračunski period ulazi i sve vrijeme provedeno u postupku obustave plaćanja,
- c) kada se roba iz privremenog uvoza uz potpuno oslobađanje od plaćanja uvoznih dažbina stavlja u slobodan promet, osim u slučaju iz člana 317. stav 4. tačka (i) Odluke, odnosno iz stava (2) tačka b) ovog člana.

(2) Kompenzatorna kamata ne plaća se:

- a) kada se privremeni uvoz uz djelimično oslobađanje od plaćanja uvoznih dažbina razdužuje ponovnim izvozom robe,
- b) kada se niže navedena roba iz privremenog uvoza uz potpuno oslobađanje od plaćanja uvoznih dažbina stavlja u slobodan promet u slučajevima iz člana 317. stav 4. tačka (i) Odluke i to:
 - 1) palete i kontejneri (Aneks B.3 Konvencije i čl. 353. i 354. Odluke),
 - 2) prijevozna sredstva (Aneks C i čl. 355. do 358. Odluke),
 - 3) lični predmeti putnika i roba uvezena u sportske svrhe (Aneks B.6 i član 360. Odluke),
 - 4) "pošiljke pomoći" za ublažavanje posljedica nesreća (Aneks B.9 i član 362. Odluke),
 - 5) nosači zvuka, slike ili podataka, roba isključivo za reklamne svrhe (Aneks B.3 i član 365. Odluke),
 - 6) roba koja prije prihvatanja u vezi sa uvjetima iz kupoprodajnog ugovora podliježe testiranju (Aneks B.3 i član 370. tačka (b) Odluke),
 - 7) roba iz Aneksa B.1. i člana 373. Odluke,
- c) u drugim slučajevima navedenim u članu 317. stav 4. Odluke, uz ispunjenje uvjeta propisanih u tim slučajevima.

(3) Kompenzatorna kamata obračunava se i naplaćuje samo na cjelokupan iznos uvoznih dažbina koji je obračunat na dan stavljanja robe u postupak privremenog uvoza (ne i PDV-a), a prema stopi koja je u primjeni dva mjeseca prije mjeseca u kojem je nastao carinski dug.

(4) Kompenzatorna kamata se obračunava mjesečno, počev od prvog dana u mjesecu nakon mjeseca u kojem je roba u vezi koje je nastao carinski dug prvi put prijavljena za privremeni uvoz, a završava se posljednjeg dana u mjesecu u kojem je nastao carinski dug.

Primjer obračuna kompenzatorne kamate:

Vrijednost robe	10.000 KM
Iznos ukupnih uvoznih dažbina (ne i PDV-a)	1.500 KM
Datum stavljanja robe u privremeni uvoz	05. marta 2012.
Datum puštanja u slobodan promet	02. jula 2012.
Period za primjenu kompenzatorne kamate - 4 mjeseca	(od 01.04.2012. do 31.07.2012.)
Stopa kompenzatorne kamate - 12%	
Iznos kompenzatorne kamate:	60 KM $\frac{(1500 \times 12 \times 4)}{12 \times 100}$

Član 35.

(Primjena preferencijalne tarifne mjere u privremenom uvozu uz potpuno oslobađanje od plaćanja uvoznih dažbina)

(1) Ako je preferencijalno porijeklo robe koja se stavlja u privremeni uvoz uz potpuno oslobađanje od plaćanja uvoznih dažbina u tom trenutku bilo prijavljeno i prihvaćeno po carinskoj prijavi IM5 (polje 47), uvozne dažbine u tom postupku po prijavi IM5 obračunavaju se po preferencijalnoj tarifnoj stopi koja je u pitanju (taj iznos i iznos PDV-a obračunatog u punom iznosu se obezbjeđuje garancijom).

(2) Preferencijalna stopa i drugi elementi prihvaćeni za obračun uvoznih dažbina, odnosno carinskog duga po carinskoj prijavi IM5 iz stava (1) ovog člana koriste se i za obračun carinskog duga koji nastane prema članu 140. stav 1. Zakona (kada se roba iz privremenog uvoza uz potpuno oslobađanje od plaćanja uvoznih dažbina stavlja u slobodan promet ili carinski dug nastane na drugi način). Navedeno se ne odnosi kada se u slobodan promet stavlja roba za koju je prethodno bio odobren privremeni uvoz uz potpuno oslobađanje prema Aneksu B.1 Konvencije i članu 373. Odluke, jer se u tom slučaju iznos carinskog duga utvrđuje na osnovu elemenata za obračun dažbina koji odgovaraju toj robi u trenutku njenog stavljanja u slobodan promet (pri čemu se može uzeti u obzir samo preferencijal koji je važeći na taj dan, vidi i član 33. stav (2)).

Član 36.

(Primjena preferencijalne tarifne mjere u privremenom uvozu uz djelimično oslobađanje od plaćanja uvoznih dažbina)

(1) Ako je preferencijalno porijeklo robe koja se stavlja u privremeni uvoz uz djelimično oslobađanje od plaćanja uvoznih dažbina u tom trenutku bilo prijavljeno i prihvaćeno po carinskoj prijavi IM5, uvozne dažbine u tom postupku po prijavi IM5 (polje 47) obračunavaju se po prihvaćenoj preferencijalnoj tarifnoj stopi koja je u pitanju (a ne po punoj carinskoj stopi iz Carinske tarife Bosne i Hercegovine). Iznos uvoznih dažbina obračunat po prihvaćenoj preferencijalnoj stopi i PDV obračunat u punom iznosu čine iznos obračunatog carinskog duga po odnosnoj prijavi IM5 (koji se tada ne knjiži, već se obezbjeđuje garancijom), od kojeg iznosa se, prema članu 32. stav (1) i (2) ovog Uputstva, obračunava carinski dug koji stvarno nastane u navedenom postupku (iznos od 3% za svaki mjesec ili dio mjeseca tokom kojeg je trajao navedeni postupak).

(2) Preferencijalna stopa i drugi elementi prihvaćeni za obračun uvoznih dažbina, odnosno carinskog duga po carinskoj prijavi IM5 iz stava (1) ovog člana koriste se i za obračun carinskog duga koji nastane prema članu 140. stav 2. Zakona, odnosno članu 32. stav (8) ovog Uputstva (kada se roba iz privremenog uvoza uz djelimično oslobađanje od plaćanja uvoznih dažbina stavlja u slobodan promet ili carinski dug nastane na drugi način).

GLAVA VI. PRIMJENA UPUTSTVA U POSTUPKU PRIVREMENOG IZVOZA**Član 37.**

(Primjena Uputstva u postupku privremenog izvoza bh. robe)

(1) Odredbe ovog Uputstva odgovarajuće se primjenjuju u postupku privremenog izvoza bh. robe namijenjene ponovnom uvozu u nepromijenjenom stanju, osim kod privremenog izvoza u okviru postupka vanjske obrade.

(2) U postupku privremenog izvoza iz stava (1) ovog člana, gdje to odgovara, koristiti se obrazac "Popis robe za privremeni izvoz uz usmenu prijavu" iz Priloga 6. ovog Uputstva.

Član 38.

(Ponovni uvoz privremeno izvezena bh. robe)

(1) Kada se privremeno izvezena roba iz člana 37. ovog Uputstva ponovno uvozi u carinsko područje Bosne i Hercegovine u nepromijenjenom stanju odgovarajuće se primjenjuje čl. 177. i 178. Zakona, uz ispunjenje uvjeta propisanih tim odredbama i Uputstvo o vraćanju izvezena robe.

(2) Privremeno izvezena roba iz člana 37. ovog Uputstva za koju je pri njenom ponovnom uvozu u carinsko područje Bosne i Hercegovine, shodno članu 177. Zakona, odobreno oslobađanje od plaćanja uvoznih dažbina, prema članu 26. tačka 4. Zakona o porezu na dodatu vrijednost, oslobođena je i od plaćanja PDV-a ako robu ponovno uvozi (vraća) isto lice koje ju je i privremeno izvezlo. Ako robu ponovno uvozi drugo lice tada ta roba podliježe naplati PDV-a.

Član 39.

(Postupak za nevraćenu privremeno izvezenu bh. robu)

(1) Kada se roba iz člana 37. ovog Uputstva koja je privremeno izvezena po izveznoj carinskoj prijavi (EX2, postupak 2300) ne vrati u carinsko područje Bosne i Hercegovine u roku od tri godine, privremeni uvoz, radi svrhe navedene u stavu (3) ovog člana, može se završiti konačnim (trajnim) izvozom.

(2) U slučaju iz stava (1) ovog člana, korisnik postupka privremenog izvoza, radi svrhe navedene u stavu (3) ovog člana, može kod carinskog ureda kod kojeg je započet postupak privremenog izvoza, u roku za ponovni uvoz, a najkasnije do isteka roka od tri godine od dana privremenog izvoza robe, podnijeti carinsku prijavu za postupak trajnog izvoza EX1 (šifra postupka 1023). Uz tu prijavu prilaže se i kopija primjerka 3 carinske prijave EX2 ovjerenog od izlaznog graničnog carinskog ureda preko kojeg je nevraćena privremeno izvezena bh. roba istupila iz carinskog područja Bosne i Hercegovine ili drugi predviđeni dokaz koji se u tu svrhu može prihvatiti.

(3) Nakon okončanja postupka po carinskoj prijavi iz stava (2) ovog člana, postupajući carinski ured, u svim primjercima izvozne carinske prijave (EX1), u polju C, kao i u inspeksijskom aktu te prijave, unosi zabilješku: "Trajni izvoz nevraćene robe sa privremenog izvoza", nakon čega primjerak 3 izvozne carinske prijave EX1 vraća korisniku postupka, kako bi nadležnim organima mogao dokazati da je roba trajno izvezena. Sam primjerak 3 EX2 carinske prijave u ovom slučaju ne može služiti u svrhe oslobađanja od plaćanja PDV-a za izvoz, nego samo carinska prijava EX1 zajedno sa potvrdom o istupu robe iz carinskog područja Bosne i Hercegovine na EX2 prijavi ili drugi predviđeni dokaz koji se u tu svrhu može prihvatiti. Primjerak 3 izvozne carinske prijave EX1 ne upućuje se na granični prijelaz radi ovjere fizičkog istupa robe iz carinskog područja Bosne i Hercegovine, jer je roba već van tog carinskog područja, a samo se shodno toj carinskoj prijavi privremeni izvoz preinačuje u trajni (redovni) izvoz. U tom slučaju, neovisno od datuma EX1 izvozne carinske prijave, smatra se da je roba trajno izvezena onog dana kada je fizički istupila iz carinskog područja Bosne i Hercegovine po prethodnoj EX2 carinskoj prijavi za privremeni izvoz.

(4) Ako bh. roba, koja je privremeno izvezena na osnovu usmene prijave uz podnošenje "Popisa robe" iz člana 37. stav (2) ovog Uputstva ili na osnovu karneta ATA, više nije namijenjena ponovnom uvozu (ne vraća se u Bosnu i Hercegovinu), u tom slučaju sam "Popis robe" ili ATA izvozni kupon (ovisno od situacije) ne može služiti u svrhe ostvarivanja oslobađanja od plaćanja PDV-a za izvoz, nego samo izvozna carinska prijava. Ako korisnik privremenog izvoza za navedenu robu podnese izvoznju carinsku prijavu, u tom slučaju odgovarajuće se

primjenjuje stav (2) i (3) ovog člana, a uz izvozu carinsku prijavu se, kao prethodni dokument i dokaz da je roba istupila iz Bosne i Hercegovine, podnosi ATA izvozni kupon ili "Popis robe" (ovisno od situacije) ovjeren od izlaznog graničnog carinskog ureda pri privremenom izvozu robe.

GLAVA VII. PRIJELAZNE I ZAVRŠNE ODREDBE

Član 40.

(Upotreba odobrenja i rješavanje zahtjeva)

(1) Odobrenja za privremeni uvoz robe u pismenom obliku izdata do dana početka primjene ovog Uputstva ostaju na snazi do isteka roka njihovog važenja pod uvjetima odobrenim tim odobrenjem, osim ako ne postoje druge smetnje za njihovo korištenje.

(2) Zahtjeve za izdavanje odobrenja za privremeni uvoz zaprimljene a neriješene do dana početka primjene ovog Uputstva rješavat će, u skladu sa odredbama ovog Uputstva, onaj carinski organ koji je za slučaj privremenog uvoza na koji se odnosi zahtjev nadležan prema ovom Uputstvu.

(3) Zahtjeve za izmjene ili dopune odobrenja za privremeni uvoz zaprimljene a neriješene do dana početka primjene ovog Uputstva rješavat će, u skladu sa odredbama ovog Uputstva, onaj carinski organ koji je izdao prvobitno odobrenje za privremeni uvoz u pismenom obliku čija se izmjena ili dopuna traži.

(4) Na carinski postupak privremenog uvoza i privremenog izvoza započetog prije dana početka primjene ovog Uputstva a koji nije okončan (razdužen) do dana početka primjene ovog Uputstva primjenjuje se ovo Uputstvo.

Član 41.

(Upotreba kontrolnika)

Do uspostavljanja novog kontrolnika za privremeni uvoz uz potpuno oslobađanje od plaćanja uvoznih dažbina i privremeni izvoz, koji se provode na osnovu usmene prijave uz "Popis robe", za evidenciju navedenih postupaka koristi se postojeći kontrolnik.

Član 42.

(Prestanak primjene ranijih propisa)

Danom početka primjene ovog Uputstva prestaju se primjenjivati:

- a) čl. 15. do 21., 28. i 34. stav (1) Uputstva o carinskom postupku u putničkom prometu ("Službeni glasnik BiH", broj 93/06) i
- b) čl. 22. i 23. Uputstva o postupku izvoza ("Službeni glasnik BiH", broj 73/06).

Član 43.

(Sastavni dio Uputstva)

Sastavni dio ovog Uputstva čine:

- a) Prilog 1. iz člana 8. stav (2) ovog Uputstva - obrazac "Popis robe za privremeni uvoz uz usmenu prijavu",
- b) Prilog 2. iz člana 13. stav (3) ovog Uputstva - "Dodatni obrazac za privremeni uvoz robe na osnovu carinske prijave IM5",
- c) Prilog 3. iz člana 32. ovog Uputstva - obrazac "Obračun carinskog duga koji se plaća odjednom (ne mjesečno) na završetku privremenog uvoza uz djelimično oslobađanje od plaćanja uvoznih dažbina",
- d) Prilog 4. iz člana 32. stav (7) ovog Uputstva - obrazac "Obračun carinskog duga na završetku privremenog uvoza uz djelimično oslobađanje od plaćanja uvoznih dažbina kada je plaćanje vršeno mjesečno",
- e) Prilog 5. iz člana 33. stav (3) ovog Uputstva - obrazac "Obračun carinskog duga kod razduživanja privremenog uvoza uz potpuno oslobađanje od plaćanja uvoznih dažbina stavljanjem robe u slobodan promet" i

- f) Prilog 6. iz člana 37. stav (2) ovog Uputstva - obrazac "Popis robe za privremeni izvoz uz usmenu prijavu".

Član 44.

(Stupanje na snagu i primjena)

Ovo Uputstvo stupa na snagu osmog dana od dana objavljivanja u "Službenom glasniku BiH", a primjenjuje se tridesetog dana od dana stupanja na snagu.

Broj: 01- 02-2-1390-1/12
Datum: 03.07. 2012. godine

DIREKTOR
Dr. Miro Džakula